

Romanos

¹ Høøch hädaa nocy njahby, høøch Pablohajpä. Høøchä Jesucristo xyajtuumb nebiä moonsän. Hamuumdu'jóothøchä miädia'agy jaduñ nyajtuunä. Diøshøch jaduñ xpiädaac cooch ndúnät apóstol. Cooch jaduñ nduñ apóstol, je'eduhñ ñänøømby coochä Dios xwyiinguejxy coochä miädia'agy nmäwädíjtät ja'a yHuungcøxpä, coo hajxy yaa hoy xñähho'túutäm.

² Jéquiänä Dios jaduñ miänaañ cooc ja'a yHuung hánajty yaa quiexa'añ hädaa yaabä naaxwiin. Jim jaduñ myiñ cujaay maa ja'a Diosmädia'aguiän. Ja'a jäya'ayä Diosmädia'agy hajxy jecy yajwá'xäbä, jaaya'ayhajxy jaduñ jecy cujahy.

³ Ja'a Jesucristo ja'a Dios jaduñ yHuunghajpy, ja'a hajxy nWiindsøn'hájtämbä. Jäya'ayhajt je'e hädaa yaabä naaxwiin neby højtshájtäm. Ja'a rey David yhap yhoc hánajty je'e.

⁴ Y coo ja'a Jesucristo yho'cy, mänit jiuypiojtägajch ja'a yhEspírituhaam. Coo jaduñ jiuypiojtägajch, jaduñ yajnajuø'oy coo je'e ja'a Dios yHuunghadyii, coo møcmäjaa jiaanç tehñ miøødä, coo ja'a Dioshespíritu jiaanç tehñ miøødä.

⁵ Coo ja'a Jesucristo hajxy xñähho'túutäm, coo jiuypiojtägajch, páadyhøchä Dios tøø xquiexy wi-induhmyhagajpt mädia'agy-yajwa'xpä ja'a Jesucristocøxpä, weenä jäya'ayä Diosmädia'agy hajxy miäbøcy, ween hajxy hoy yajtuñ, weenä Jesucristo

hajxy jaduhñ wyingudsähgø'oy. Coochä Dios jaduhñ tøø xquiexy, yajcähxø'py je'eduhñ cooch jaduhñ xquiumay.

⁶ Møød mijtsä Dios xyajnähdijpä coo ja'a Jesucristo miädia'agy hajxy mbanócxäbät, mijts jim hijpä maa ja'a cajpt jaduhñ xiøhatiän Roma.

⁷ Mijts hädaa nocy nyajnäjaayøøby, pønjatiä Dios yaghijpy quiø'øjooty jim Roma. Jaaya'ay mijts jaduhñ xyajnähdij coo ja'a miädia'agy hajxy mmäbójcät. Xjiaanč tehñ chojp mijts jaaya'ay jaduhñ. Ween mijtsä hoyhajtä weenhajt xmio'oy møødä yHuung Jesucristo, ja'a hajxy nWiindsøñhajtämbä. Ja'a Dios hajxy nDeedyhajtäm.

⁸ Jayójp høchä Dios Dioscujú'uyäp nmo'oy. Coo ja'a Dioscujú'uyäp hajxy jaduhñ nyéjcäm, mäniä Jesucristo hajxy jaduhñ xñähgapxtúutäm. Wiinduhmyhagajptä mädia'agy wiädity cooc mijtsä Diosmädia'agy hoy mjaanč tehñ miäbøcy nägøxiä. Páadyhøchä Dioscujú'uyäp nyecy.

⁹ Ńajuøøbiä Dios cooch tøy nmädia'agy cooch nmäna'añ coo mijts homiänaajä njahmiech coochä Dios naxy nba'ya'axy. Hamuumdu'jóothøchä Dios nmøødtuñ coochä miädia'agy nyajwa'xä ja'a yHuungcøxpä.

¹⁰ Mayhóoc-høch jim tøø nja nøcxa'añ maa mijtsän. Jaduhñ høchä Dios nja wi'i ñäma'ay cooch jim xyajnöcxät. Wehñdä jaduhñ miänáañät.

¹¹ Páadyhøch jim nja wi'i ñøcxa'añ maa mijtsän, jaduhñ mijts hoy nbuhbédät ja'a Diosh-espíritucøxpä, jaduhñä Diosmädia'agy hajxy maas hoy mmäbøgät.

12 Coo ja'a Diosmädia'agy hajxy näguipxy nmäbójcäm, páadyhøch jim nja wi'i ñøcxa'añ maa mijtsän, jadhun hajxy hoy hamiñ haxøpy nnijootcapxmøcpójcämät.

13 Mägu'ughajpådøjc, jadúhnhøch nja wi'i miäna'añ cooch jim nja wi'i ñøcxa'añ maa mijtsän, cáboch jadhun nnä'ä yajnäbaadø'øy. Páadyhøch jim nja wi'i ñøcxa'añ, chójpiøchä njoot jadhun coo hajxy mjaac mayø'øwät maa ja'a Diosmädia'agy hajxy mmäbøquiän, nebiä mäbøjpådøjc-hajxy tøø miayø'øyän wiingtuumjaty, majátyhøchä Diosmädia'agy tøø nyajwa'xiän.

14 Jadúhnhøchä Dios xwyiinguejxy coochä miädia'agy nyajwá'xät ja'a yHuungcøxpä wiinduhmyhagajpt majatiä jäya'ayhajxy griegohaam miädia'aguiän, møød majatiä jäya'ayhajxy griegohaam quia'a mädia'aguiän. Jadúhnhøch tøø xwyiinguejxpä coochä jäya'ay jadhun nägøxiä nyajwiingapxø'øwät, hoy hajxy jia høxpøquiä, hoy hajxy quia'a jagä høxpøquiä.

15 Páadyhøch jim nja wi'i ñøcxaambä Roma maa mijtsän, jímhøchä jäya'ayä Diosmädia'agy nyajwiingapxø'øwaambä.

16 Hix, cábochä Diosmädia'agy nmädsähdiuñ ja'a Jesucristocøxpä, je'eguiøxpä coo jäya'ayhajxy nägøxiä piäda'aga'añii hawa'adstuum ja'a Dios miäjaahaam, pønjetiä Diosmädia'agy mäbøjp ja'a Jesucristocøxpä. Højts judíos, højts ja'a Diosmädia'agy jayøjp nmädoodsøn. Høxhaamä jäya'ayhajxy jiaac mädooyy, ja'a hajxy ca'a judíospä.

17 Ja'a miädia'agyhaamä Dios hajxy xyajwiin-

juoøyyäm coo piäda'aga'añ hawa'adstuum pønjaty jaduhñ mäbøgaamb coo ja'a Dios yajtøjiada'añ waambaty tøø quiapxy tøø miädia'agy. Pøn jaduhñ ca'a mäbøgaamb, cab je'e piäda'aga'añii hawa'adstuum. Jaduhñ jim myiñ cujaay maa ja'a Diosmädia'aguiän: “Pønjaty jaduhñ mäbøgaamb coo ja'a Dios yajtøjiada'añ waambaty tøø quiapxy tøø miädia'agy, je'e ja'a Dios jaduhñ piäda'agaamby hawa'adstuum. Je'e jaduhñ nøcxaamb Dioswiinduum.”

¹⁸ Hoy piønä jaduhñ ñajuø'øy coo ja'a Dios tsajpootypä yajcumädowna'añ pønjatiä Dios ca'a wiingudsähgøøby, møød pønjatiä jioot ca'a tsojp coo ja'a Dios wyiingudsähgø'øwøøjät wiinghäna'c. Paadiä jioothajxy jaduhñ quia'a tsoy je'eguiøxpä coo hajxy haxøøg jiaac jatcø'øwa'añ.

¹⁹ Cabä tøyhajtpä hajxy chocy, hoyyä Dios hajxy tøø jia yajwiinjuø'øyii nebiatiä Dios jaduhñ wyiinmahñdyhaty.

²⁰ Jéquiänä Dios cøxiä yhädiuñ, møød yø'ø tsajt, møød hädaa yaabä naaxwiin, cøxiä. Coo hajxy jaduhñ nhíxäm tijaty ja'a Dios jaduhñ tøø yhädiuñ, paadiä tøyhajtpä hajxy nmøødhájtäm coo ja'a Dios møcmäjaa miøødä homiänaajä, møød coo cøxiä wiinä yhane'emy, hoyyä Dios hajxy nga'a jagä híxäm. Jaduhñä tøyhajtpä hajxy nmøødhájtäm coo ja'a Dios hajxy nwiingudsähgøøyyämät. Cab jaduhñ pøn hawiinmats miäná'anät cooc tyijy hajxy quia'a najuø'øy coo ja'a Dios jyijjä.

²¹ Ja'a häna'c-hajxy jaduhñ haxøøg jatcøøbiä, cabä Dios hajxy wyiingudsähgø'øy, hoy hajxy jaduhñ jia najuø'øy coo ja'a Dios jyijjä. Ni cabä Dios Dioscujú'uyäp hajxy mio'oy. Paadiä wyiin-

mahñdyhajxy quia'a tsoobaada'añ. Y paady hajxy tehngajnä wyiinmahñdyhada'añ haxøøg. Cabä howyiinmahñdy hajxy hoy miøødhadaañnä.

²² Hoy hajxy jia nibiäda'agyii nebiä jaanč tehmn jiajpän, cab hajxy tii ñä'ägädä jaty.

²³ Ja'a Dios, mõj jaanč je'e. Hoy miänaajä yhity. Cab jaduñ mänaa yho'ogy. Pero cabä haxøøghäna'cä Dios hajxy wyiingudsähgø'owa'añ. Jäya'ayhahädiuunnaxy hajxy wyiingudsähgøøby, hoyyä jäya'ayhajxy jia ho'ogy; mõødä muuxyhahädiuunnaxy hajxy wyiingudsähgøøbiä, mõødä tsahñdyhahädiuunnaxy, mõødä animalhahädiuunnaxy ja'a hamädaaxtecypiä.

²⁴ Paady, cabä Dios waamb miäna'anaañnä, weenä jäya'ayhajxy haxøøg wyiinmahñdyhaty nebiä jioot hajxy choquiän, coo hajxy cøxypänejpiä ween ñidiuñii hočhähdiiuunnä,

²⁵ je'eguiøxpä coo ja'a tøyhajtpä hajxy tøø quia'a mäböcy ja'a Dioscøxpä. Ja'a høhnda'agymiädia'agy hajxy jaduñ miäböjpy. Cabä Dios hajxy wyiingudsähgø'øy. Jue'e hajxy wyiingudsähgøøby, tijatiä Dios yaa tøø quiunuu'xy hädaa yaabä naaxwiin. Pero, hahixøøby coo ja'a Dios hajxy nwiingudsähgøøyyämät homiänaajä. Tøyhajt jaduñ.

²⁶ Coo häna'cä Dios hajxy quia'a wiingudsähgø'owa'añ, paadiä Dios waamb quia'a mäna'ana'añ, ween hajxy hočhähdiiuunnä ñidiuunnä. Høxtä to'oxiøjpaadyhajxy jaduñ jiatcø'øy. Cabä ñihyhap hajxy näje'e miøødsäna'awaañnä; quipxyjatiä to'oxiøjc-hajxy cøxypänejpiä ñidiuñii hočhähdiiuunnä.

27 Jaanä jaduhñä ya'adiøjc-hajxy näje'ebä, cabä tio'oxiøjc hajxy miøødtsäna'awaannä. Quipxyjatiä ya'adiøjc-hajxy ñimiøødtsäna'awa'añii. Hoçhähdiiuunnä hajxy jaduhñ ñidiuñii cøxpänejpiä. Coö hajxy jaduhñ jiatcø'øy, paady hajxy quia'a niyaghoyø'øyii maa ja'a ñi'xcøxp maa ja'a quiopcøxphajxiän, møød maa ja'a wiinmahñdycøxphajxiän.

28 Coö ja'a haxøøghäna'cä Dios hajxy jaduhñ quia'a wiingudsähgø'øwa'añ, paady hajxy ñajtshixø'øyii ja'a Diósäm. Ja'a Dios, cab jaduhñ waamb miäna'anaannä, weenä yhaxøøgwiinmahñdy hajxy tiuñ, ween hajxy jaduhñ jiaac jiatcø'øy haxøøg.

29 Madiu'u hajxy haxøøg jiatcø'øy cøxpänejpiä. Miøødtsänaabiä cuhhiñdo'oxiøjc hajxy. Møødä jäya'ajie'e hajxy yhadsoy. Cab hajxy hojiäwø'øy pø jimä miägu'ughajpähajxy cøxiä wiinä miøødä. Høxtä niyaghó'cäp hajxy. Nimiädsiphájtäp hajxy. Høhñdaacp hajxy. Niñähøønøøyyäp hajxy.

30 Niwyiingapxpéjtäp hajxy. Møødä Dios hajxy miähahaty. Nibiéjxäp hajxy. Yajcumayaamb hajxy. Hawiinjemybiä haxøøgwiinmahñdy hajxy yajcojpy. Cabä tiaj, cabä tieediä miädia'agy hajxy miäbøjcä.

31 Jaanç tehñ quiuhxex hajxy. Ni ja'a yhamd-soo mädia'agy hajxy quia'a cudiuna'añ. Cab hajxy pøn chocy miee'xy. Ni cab hajxy pøn miee'xa'añ. Cabä hojioot hajxy ñä'ägädä møødä.

32 Ñajuøøby hajxy jaduhñ coö ja'a Dios tøø yhane'emy coö hajxy haxøøgjaty quia'a jiatcø'øwät nébiøch naamñä tøø nmädia'aguiän. Jaanä jaduhñ

hajxy ñajuøøbiä, pøn jaduñ haxøøg jatcøøby, quiumädownamby hajxy je'e tehngajnä. Pero nägø'ø nädecypiä hajxy jaduñ jiatcø'øy, hoy hajxy jaduñ jia najuø'øy. Høxtä xoonäacp hajxy jaduñ coo wiinghäna'c-hajxy jaduñ haxøøg pi-ajadcøøbiä.

2

1-3 Nnajuøøyyäm hajxy jaduñ coo jaduñ yhahixø'øy coo ja'a Dios hajxy nägøxiä xyajcumädóowämät je'eguiøxpä coo hajxy nägøxiä haxøøg njatcøøyyäm. Cab jaduñ yhahixø'øy coo højtsä jäya'ay nnänøømämät coo hajxy hoy quia'a hity, coo hajxy ween quiumädoy. Caj pues, haa ca'a, jaduñ højts haxøøg nbajadcøøyyämbä. Hix, ni pøn jaduñ hahixøøby quia'a mäná'anät cooc tyijy hoy tiehm yhity. Paady jaduñ yhahixø'øy coo ja'a Dios hajxy nägøxiä xyajcumädóowämät, je'eguiøxpä coo hajxy hoy nga'a hoyhidáañäm.

4 Pero hojiootä Dios jiaanč tehñ miøød, paady hajxy xquia'a tsoj tsaächtiúunäm. Chojpiä jioot jaduñ coo howyiinmahñdy hajxy nbadu'ubójcänät, coo ja'a nhaxøøgwiinmahñdy hajxy nnajtshixøøyyänät.

5 Pero jii jäya'ayhajxy näje'e, jaanč tehñ xiexä quiopcä tiaatsc-hajxy. Cabä yhaxøøgwiinmahñdy hajxy ñajtshixø'øwa'añ. Y coo hajxy jaduñ tehngajnä quia'a mábøgät, mänit hajxy hñajty hanaxiä chaačhpøga'añ coo yhabáadät coo ja'a Dios ja'a cahwiindøyhäna'c hñajty chaačhtiuna'añ.

6-10 Pønä jioot nägø'ø nädecypiä tsojp coo hoy yhídät, pønä jioot pädaacp coo jim ñócxät

Dioswiinduum, coo ja'a hoyhajtä weenhajt jim piädät, coo jim quiumayøøjät ja'a Diósäm, pues je'edsä Dios jim yajnøcxaamby. Mio'owaambiä Dios je'e ja'a hoyhajtä weenhajt. Quiumayaambiä Dios jaduñ. Yaghidaambiä Dios je'e jootcuic homiänaajä, hopiønä, hoy jia judíosä, hoy quia'a jagä judíosä. Pero hoyhoyyä Dios chaaçhtiuna'añ pøn haxøøg jatcøøby, pønä Diosmädia'agy ca'a cudiunaamb, pøn ca'a yajmägapx ca'a yaghane'emaamb waambatiä Dios hajxy jaduñ xjia hanéhäm. Hopiønä jaduñ chaaçhpøga'añ, pønjaty jaduñ haxøøg jatcøøby, hoy hajxy jia judíospä, hoy hajxy quia'a jagä judíospä.

¹¹ Hix, cabä Dios miøjpäda'agy pø mjudío miich, pø caj. Je'e yajcopcøøby pø mhoyhäna'c, pø caj.

¹²⁻¹⁵ Højts judíoshajpä, jequiän højtsä Dios xyhanehmy neby højts hoy nguhdujthädät. Mänitä Moisés ja'a mädia'agy jaduñ quiujahy nebiaty højts hoy nguhdujthädät. Hoorä, ja'a häna'c-hajxy ca'a judíospä, cabä mädia'agy hajxy miädoyyä nebiä Moisés jecy quiujahyyän. Pero hoy hajxy quia'a jagä mädoyyä, coo hajxy hamdsoojoot hoy quiudiúnät nebiä Dios jioot jia tsoquiän, cähxø'øgäp jaduñ coo hajxy yhawáañäxä ja'a Diósäm ja'a wyiinmahñdyhaamhajxy. Jaduñ hajxy hamdsoo ñajuø'øy pø hoy hajxy quiuidiüñ, pø caj. Jaduñ hajxy yajtuungpaady néjjiäm hajxy häxøpy tøø miädoy ja'a mädia'agy ja'a Moisés jecy quiujahyyäbä. Y coo hajxy hoy quia'a cudiúnät neby hajxy ñajuø'øy ja'a wyiinmahñdyhaamhajxy, mänit hajxy quiumädowa'añ. Jaaná jaduñ højtspä, højts judíospä, coo højts nga'a cudiúnät

neby hõjtsä Dios jecy xyhanehmiän, nebiä Moisés ja'a mädia'agy jecy quiujahyyän, jaduñ hõjts ngumädowaambä. Hix, pøn jaduñ cudiuumb nebiä Dios yhane'emiän, je'e ja'a Dios piäda'agaamby hawa'adstuum, hoyyä mädia'agy tøø quia'a jagä mädoyn nebiä Moisés jecy quiujahyyän. Pero pøn jaduñ ca'a cudiuumb, hoyyä mädia'agy tøø jia mädoyn nebiä Moisés jecy quiujahyyän, cab je'eduhñ hawa'adstuum piäda'aga'añii ja'a Diósäm. Jaduhñds je'e, nägøxiä ja'a cahwiindøyhäna'c-hajxy quiumädowa'añ, hoy hajxy jia judíospä, hoy hajxy quia'a jagä judíospä.

¹⁶ Mänit hajxy jaduñ quiumädowa'añ coo ja'a Dios ja'a Jesucristo hänajty yaa quiejxtägatsa'añ hädaa yaabä naaxwiin. Mänitä jäya'ayhajxy yhixa'añii ja'a Jesucristäm nebiaty hajxy hänajty yaa tøø jiatcø'oy. Mänit hajxy yagjahmiejtsta'aga'añii nebiaty hajxy hänajty tøø wyiinmahñdyhaty hamee'ch. Jaduhñä Diosmädia'agy miäna'añ ja'a Jesucristocøxpä, ja'açh nyajwa'xypä.

¹⁷ Hõjts judíosjapä, naxy hõjts nniguiumayii coo hõjts njudíoshaty, coo hõjtsä mädia'agy nmäbøcy ja'a Moisés jecy quiujahyyäbä. Jaduhñ hõjts nniguiumäyyäbä coo hõjtsä Dios tøyhajt xqui'u'ughaty, hõjtsyähajtiä, hõjts judíosjapä.

¹⁸ Nnajuøby hõjts jaduñ nebiatiä Dios jioot chocy coo hõjts nhoyhäna'c-hädät. Y ja'a mädia'agy ja'a Moisés jecy quiujahyyäbä, je'e hõjts jaduñ xyhawáañäp neby hõjts nwiimbíwät tii hoy tii mäbaad.

¹⁹⁻²⁰ Niyhajuøyyäp hõjts coo hõjts häna'c hoy nyajnahixø'øwa'añ, ja'a häna'cä Diosmädia'agy ha-

jxy ca'a jajpä ca'a najuøøbiä. Jim højtsä tøyhajt nbaady maa ja'a mädia'aguiän, ja'a Moisés jecy quiujáhyyäbä.

21 Hoorä, coo højts häna'c jaduhñ nyajnähixø'øy ja'a Diosmädia'agy, hahixøøby jaduhñ coo højtsä Diosmädia'agy hoy ngudiúnät. Cábøchä nmägunaaxhajxy näje'e hoy quiudiuñ. Y coo højts häna'c nmägapxy nhane'emy coo hajxy quia'a méedsät, hahixøøby jaduhñ coo højts nga'a mée'tspät. Jadúhñhøchä nmägunaaxhajxy näje'e jiatcø'øy.

22 Y coo højts häna'c nmägapxy nhane'emy coo wiinghäna'cä tio'oxiøjc hajxy quia'a møødtsänáyyät, cab jaduhñ yhahixø'øy coo højts jaduhñ njatcøøbiät. Jadúhñhøchä nmägunaaxhajxy näje'e jiatcø'øy. Cab højts quepychech naaxpoch nwiingudsähgø'øy. Pero cab jaduhñ yhahixø'øy coo højts xädø'øñ nméedsät tsajtøgooty maa ja'a quepychech naaxpoch yhitiän. Jadúhñhøchä nmägunaaxhajxy näje'e jiatcø'øy.

23 Niguiumáyyäp højts jaduhñ coo højtsä mädia'agy nmäbøcy ja'a Moisés jecy quiujáhyyäbä. Pero näje'eöchä nmägunaaxhajxy, cab hajxy hoy quiudiuñ. Jaduhñ hajxy yajcähxø'øgy coo ja'a Dios hajxy tøyhajt quia'a wiingudsähgø'øy.

24 Jaduhñ jim myiñ cujaay maa ja'a Diosmädia'aguiän: “mijts judíos hajpä, coo ja'a Diosmädia'agy hajxy hoy mga'a cudiuñ, paadiä Dios haxøøgjaty ñähojyii ja'a häna'c-hajxy ca'a judíos pä.” Tøyhajt jaduhñ.

25 Højts, judíos højts nmäminø'øy nmäga'awø'øy.

Mänit hõjtsä Dios xquiumáyät coo hõjtsä mädia'agy hoy ngudiúnät, ja'a Moisés jecy quiujáhyyäbä. Pero coo hõjts jaduhñ hoy nga'a cudiúnät, cab hõjtsä Dios jaduhñ xquiumaya'añ.

²⁶ Hoorä, ja'a häna'c-hajxy ca'a judíospä, coo hajxy hoy quiudiúnät nebiä Dios yhane'emiän, mänit hajxy quiumaya'añii ja'a Diósäm.

²⁷ Näje'echä nmägunaaxhajxy, cab hajxy hoy quiudiuñ nebiä Dios yhane'emiän, hoy hajxy judíos jia mäminø'øy jia mäga'awø'øy, hoyyä mädia'agy hajxy jia mädoyyä, ja'a Moisés jecy quiujáhyyäbä. Je'ehajxy mæbøcypiä ca'a cumayáañäp ja'a Diósäm.

²⁸ Pønjaty hoy cudiumb nebiä Dios yhane'emiän, je'edsä Dios quiu'ughajpy, hoy hajxy judíos quia'a jagä mäminø'øy quia'a jagä mäga'awø'øy, hoyyä hijxtahñd hajxy quia'a jagä møødä maa ja'a ñi'xcøxphajxiän neby hõjts judíos nmøødän.

²⁹ Hix, coo pøn hoy quiudiúnät hamuumdu'joot nebiä Dios choquiän, mänit hajxy quiu'ughada'añii ja'a Diósäm, hoyyä judíoshajxy näje'e quia'a ja mäna'añ cooc tyijy hajxy jaduhñ quia'a cu'ughadyii ja'a Diósäm. Hix, quiumaabiä Dios jaduhñ pøn jaduhñ cudiumb hamuumdu'joot.

3

¹⁻² Xchoobáatäp hõjts jaduhñ madiu'u coo hõjts judíos nmäminø'øy nmäga'awø'øy, coo hõjtsä hijxtahñd nyajpäda'agy maa hõjts nni'xcøxpän, ja'a jaduhñ yajcähxø'pä coo hõjtsä Dios xquiu'ughaty. Tøyhajt jaduhñ. Haa ca'a, Dios hõjts nhap ndeedy

jecy xyajcø'ødägøøyyä ja'a mädia'agy ja'a Moisés jecy quiujáhyyäbä. Mänit hajxy ñämaayyä ja'a Diósäm coog hajxy hänäjty quiu'ughada'añii.

³⁻⁴ Y je'enä hõjtsä Dios xquiu'ughatyñä neby hõjts jecy xyajwiinwaanøøyyän, hoy hõjts nhap ndeedy nämay hoy quia'a jagä cudiuuñ neby hajxy hänäjty tøø yhane'emyiijän ja'a Diósäm. Tøyhajt jaduhñ coo ja'a Dios tiømiädia'agy. Cabä Dios mänaa yhøhnda'agy, hoy hajxy nägøxiä cu nja mänáanäm cooc tyijy ja'a Dios quia'a yajtøjiaty waambaty hajxy tøø xyajwiinwaanøøyyäm. Jaduhñ jim myiñ cujaay maa ja'a Diosmädia'aguiän:

Diosteedy, hopiønä jaduhñ ñajuø'øy coo miich myajtøjiaty waambaty hõjts miich tøø xya-jwiinwaanø'øy.

Coo miich pøn xñäxø'øwø'øwät cooc tyijy miich jaduhñ mga'a yajtøjiaty waambaty miich tøø mmädia'agy,

cähxø'øgaamb jaduhñ coo je'e yhøhnda'agy, ja'a miich jaduhñ xñäxø'øwøøbiä.

⁵ Jaanç tehñ yhooyä Dios yhity. Pero hõjts, cab hõjts hoy nnä'ägä hjtäm. Tøyhajt jaduhñ. Paadiä, cähxø'p jaduhñ coo ja'a Dios jiaanç tehñ hoyyä. Hix, coo hõjts häxøpy nhjtäm hoy, cab jaduhñ häxøpy quiähxø'øgy coo ja'a Dios jaduhñ hoy jiaanç tehñ yhity. Pero jaduhñä jäya'ayhajxy näje'e miäna'añ cooc tyijy ja'a Dios howyiin-mahñdy quia'a møødä, je'eguiøxpä coo hajxy xya-jcumädowáanäm.

⁶ Pero hahixøøby jaduhñ coo ja'a Dios hajxy xyajcumädóowämät. Haa ca'a, coo ja'a Dios häxøpy

hoy quia'a hity, cabä cuhdujt häxøpy miøødä coo hajxy jaduhñ xyajcumädóowämät.

7 Hoyyä jäya'ayhajxy näje'e jia mäna'añ cooc tyijy ja'a Dios quia'a yajtøjiaty waambaty tøø quiapxy tøø miädia'agy, yajnajuøøby jaduhñ coo ja'a Dios tøyhajt mänaa quia'a høhnda'agy. Jaduhñä jäya'ayhajxy nägøxiä ñajuø'øwa'añ coo jaduhñ yhäxixø'øy coo ja'a Dios hajxy nwiingudsähgøøyyämät. Pero coo pønä Dios jaduhñ ñänømät cooc tyijy quia'a yajtøjiaty waambaty tøø quiapxy tøø miädia'agy, häxixøøby jaduhñ coo je'e quiumädówät.

8 Näje'eçhä jäya'ayhajxy xñähøønø'øy cóogøch tyijy nmäna'añ cooc tyijy jaduhñ yhäxixø'øy coo hajxy häxøøg njatcøøyyämät, jaduhñäc tyijy maas hoy quiähxø'øga'añ coo ja'a Dios jiaanç tehñ yhöyyä. Ja'a hänä'c-høch hajxy jaduhñ xñähøønøøbiä, høhndaacp hajxy jaduhñ. Häxixøøby jaduhñ coo hajxy quiumädówät.

9 Jaanä jaduhñ højts judíospä, cab højtsä Diosmädia'agy maas hoy ngudiuñ quejee ja'a häna'c-hajxy ca'a judíospä. Haa ca'a, tøøch nhuuc mänaambä coo hajxy jaduhñ hoy nga'a nä'ägä hojiäya'ayhajtäm, coo ni pønä Diosmädia'agy hoy quia'a nä'ägä cudiuñ, ni højts judíos, ni ja'a häna'c-hajxy ca'a judíospä. Hamdsoojoot hajxy jaduhñ hoy nga'a jäya'ayhajtäm.

10 Jaduhñ jim myiñ cujaay maa ja'a Diosmädia'aguiän:

Ni pøn hoy quia'a wädity.

11 Ni pøn jaduhñ quia'a wiinjuø'øwa'añ nebiä Dios wyiinmahñdyhatiän.

Ni pønä jioot quia'a päda'agy maa ja'a Diosän.

12 Tøø ja'a jäya'ayä Diosmädia'agy hajxy nägøxiä ñajtshixøøñä.

Cøjnøø cøjtu'u hajxy tøø piadu'ubøjnä.

Haxøøg hajxy jäya'ayhajnä nägøxiä.

13 Jaanč tehṁ yhaxøøg hajxy quiapxy miädia'agy. Jaduhnä yhaawhajxy tiocxuugy nebiä ho'oguiäya'ajiut tiocxuuguiän, ja'a tøø yhawá'ačhäbä.

Jaanč tehṁ yhøhndaacp hajxy. Jaduhnä haxøøgpä hajxy yaghity yhaawjooty nebiä haxøøgtsahñdyhaawän.

Jaanč tehṁ miägaxpoj p hajxy.

14 Jaanč tehṁ quiapxtägooby hajxy hoñejpiä nebiä jioot hajxy yajmädsoquiän. Jaanč tehṁ yhaxøøg hajxy ñiñänømyii.

15 Jaanč tehṁ piaquiä jootma'ad hajxy piaadyii, mänitä miäya'adiøjc hajxy nøcxy yagho'oga'añ.

16 Jaanč tehṁ chipyajpädø'p hajxy majaty hajxy wiädity. Chaačhtiumbiä cu'ug hajxy jaduhn.

17 Jaanč tehṁ chiptsojp hajxy.

18 Cab hajxy tiajy miay pø yajcumädowáañäbä Dios hajxy.

19 Jaduhnḁs je'e, yajcumädowaambiä Dios ja'a jäya'ay nägøxiä, pønä miädia'agy hoy ca'a cudiúunäp, møød højts judíos, møødä häna'c-hajxy ca'a judíospä. Højts judíos, højtsä poj pä nmaas møød, je'eguiøxpä coo højtsä Dios ja'a nhapä ndeedy jecy xjia hanehmä coo hajxy haxøøgjaty

quia'a jatcø'øwät nébiøch naamnä tøø ngujaayän. Pero cab højts jaduhñ nnä'ägädä cudiuna'añ.

²⁰ Jéquiänä Dios ja'a Moisés yhanehmy coo ja'a miädia'agy quiujáhyyäxät. Jaduhñ hajxy nnajuøøyyäm coo hajxy nägøxiä hoy nga'a jäya'ayhajtäm. Ni pøn jaduhñ hoy quia'a cudiuna'añ ja'a Diosmädia'agy. Coo ja'a Jesucristo hajxy tøø xñähho'túutäm, paadiä Dios hajxy xpiäda'agáañäm hawa'adstuum, caj jie'eguiøxpä cooc tyijy ja'a mädia'agy hajxy hoy ngudiúunäm, ja'a Moisés jecy quiujáhyyäbä.

²¹⁻²⁶ Hoorä, nnajuøøyyäm hajxy jaduhñ coo hajxy nägøxiä haxøøg njatcøøyyäm, mäduhñtiä hajxy yaa ndsänáyyäm hädaa yaabä naaxwiin, møød højts judíos, møødä häna'c-hajxy ca'a judíospä. Cabä Dios pøn ñä'ägädä cumay. Jaduhñä jäya'ayhajxy näje'e miäna'añ cooc tyijy hajxy piäda'aga'añii hawa'adstuum coogä jecymiädia'agy hajxy hoy quiudiúnät, ja'a Moisés jecy quiujáhyyäbä. Pero tøø hajxy nhíxäm coo ni pøn jaduhñ quia'a päda'aga'añii hawa'adstuum. Hoorä, jéquiänä Dios wyiinmaayy coo ja'a yHuang hänajty yaa quiexa'añ maa højtshajtäm. Mayhajtä Dios hänajty tiunaamby maa højtshajtäm. Jaduhñ hajxy hänajty xpiäda'agáañäm hawa'adstuum. Jim jaduhñ myiñ cujaay maa ja'a jecymiädia'aguiän, ja'a Moisés jecy quiujáhyyäbä. Pero cabä jecyjiäya'ayhajxy hänajty wyiinjuø'øy. Hojiotä Dios miøød coo ja'a jecyjiäya'ayhajxy quia'a pädaacä haxøøgtuum, hoy hänajty jia hawiinmatsä coo hajxy jim cu piädaacä, je'eguiøxpä coo hajxy hänajty haxøøg jiatcø'øy. Paadiä Dios ja'a yHuang ñähdujcy, jaduhñä jäya'ayä piojpä quiädieey

hajxy ñähwá'adsät. Jaduhn̄ quiähxø'ogy coo ja'a Jesucristo ja'a jecyjiäya'ay yajñähwaach ja'a piojpä quiädieeyhajxy. Høxtä jäda'anäbaadyñä ja'a Dios hajxy xyajwiinjuøyyäm neby hajxy xpiädáacäm hawa'adstuum. Jaaná jaduhn̄ hajxy xyajwiinjuøyyämbä coo hajxy piäda'aga'añii haxøøgtuum pønjaty haxøøg jatcøøby jäda'ahaty. Paadiä Dios ja'a yHuung ñähdujcy, ja'a Jesucristo, neby hajxy jaduhn̄ xñähho'túutämät. Y coo hajxy jaduhn̄ nmäbøjcamät coo ja'a Jesucristo hajxy tøø xjiaanč nähho'túutäm, jaduhn̄ä Dios ja'a nbojpä ngädieey hajxy xyajñähwáatsäm, jaduhn̄ hajxy xpiädáacäm hawa'adstuum, hopiønä, møød højts judíos, näguipxy møødä häna'c-hajxy ca'a judíospä. Mayhajtä Dios jaduhn̄ tiuun̄ maa højtshájtäm coo hajxy jaduhn̄ xpiädáacäm hawa'adstuum.

27-28 Cab jaduhn̄ yhawiinmatsä coo hajxy hamdsoo nniguiumáayyämät. Hix, coo hajxy nmäbøjcamät coo ja'a Jesucristo hajxy tøø xñähho'túutäm, paadiä Dios hajxy xpiäda'agáanäm hawa'adstuum, hoy hajxy nga'a jagä panócxäm nebiä Moisés jecy quiujahyyän. Coo ja'a Dios hajxy häxøpy xpiädáacäm hawa'adstuum je'eguiøxpä coo ja'a jecymiädia'agy hajxy ngudiúunäm, ja'a Moisés jecy quiujáhyyäbä, mänit hajxy mäbøcy cu nniguiumáayyäm hamdsoo. Pero caj pøn̄ jaduhn̄ piäda'aga'añii hawa'adstuum hamdsoohaam.

29-30 Tu'uquüä Dios jaduhn̄. Tu'cuhdujtä Dios hajxy xyhíxäm nägøxiä, møød højts judíos, møødä häna'c-hajxy ca'a judíospä. Tøyhajt jaduhn̄. Coo hajxy nägøxiä nmäbøjcamät coo ja'a Jesucristo hajxy tøø xñähho'túutäm, paadiä Dios hajxy jim̄

xpiädáacämät hawa'adstuum nägøxiä.

³¹ Pero cáboch nmäna'ana'añ coo ja'a jecymiädia'agy quia'a tøyyä, ja'a Moisés jecy quiujáhyyäbä, hoy hajxy nja wiinjuóøyyänä coo ja'a Jesucristo hajxy xpiädáacäm hawa'adstuum mänaa hajxy tøø xñähho'túutäm. Hix, maas hoy hajxy jaduhñ nwiinjuóøyyänä coo ja'a jecymiädia'agy jaduhñ jiaanč tøyyä, ja'a Moisés jecy quiujáhyyäbä. Coo hajxy nmäbøjcäm coo ja'a Jesucristo hajxy tøø xñähho'túutäm, paady hajxy xpiädáacäm hawa'adstuum, caj jie'eguiøxpä cooc tyijy ja'a jecymiädia'agy hajxy jaduhñ hoy ngudiúunäm. Tøø hajxy jaduhñ nwiinjuóøyyänä coo jaduhñ tiøyhajtä.

4

¹ Højts judíos, højtsä Abraham jecy nhaphajt ndeedyhajt.

² Høyyä Abraham hijty jiäya'ayhaty jegyhajty. Hoorä, coo ja'a Dios ja'a Abraham häxøpy tøø piäda'agy hawa'adstuum je'eguiøxpä coo ja'a Abraham hoy jia jäya'ayhajty, mänitä Abraham cu ñiguiumaayyä.

³ Hix, paadiä Dios ja'a Abraham piädaacy hawa'adstuum, coo ja'a Abraham ja'a Dios miädia'agy miäbøjcä cooc ja'a Dios yajtøjiaty waambaty tøø quiapxy tøø miädia'agy, ca'a jie'eguiøxpä coo ja'a Abraham hoy jiäya'ayhajty. Jaduhñ jim myiñ cujaay maa ja'a Diosmädia'aguiän.

⁴ Hoorä, ja'a cuduumbädøjc, paady hajxy miäjuyii coo hajxy quiuduñ, cab jaduhñ ñä'ä mayhajtä. Jaduhñ miäbaady nebiä jäya'ayhajxy

näje'e wyiinmahñdyhatiän. Yajcumayaamb hajxy ja'a Diósäm, paady hajxy jia wi'i yhojiäya'ayhada'añ.

⁵ Pero pønjaty tøø miäbøcy coo ja'a Dios yajtøjiaty waambaty tøø quiapxy tøø miädia'agy, je'edshajxy jaduhñ hawa'adstuum päda'agáañäp. Paady hajxy jim piäda'aga'añii coo hajxy jaduhñ miäbøcy, ca'a jie'eguiøxpä coo hajxy hoy jia jäya'ayhaty. Jim hajxy jaduhñ piäda'aga'añii, hoy hajxy haxøøg tøø jia jatcø'øy. Tiuumbiä Dios mayhajt jaduhñ. Coo ja'a Dios hajxy häxøpy xpiädáacäm hawa'adstuum je'eguiøxpä cooc tyijy hajxy hoy njäya'ayhátäm, cab hajxy häxøpy nmánáañäm cooc ja'a Dios mayhajt tiuñ.

⁶ Jaduhñä David jecy miänaañ cooc hajxy jootcujc yhida'añ, pønjaty jaduhñ najuøøby coo ja'a Dios hajxy xpiädáacäm hawa'adstuum ja'a miayhajthaam, hoy hajxy hänajty haxøøg tøø jia jatcø'øy. Hix, cabä Dios miøjpäda'agy pø cabä häna'c hänajty hoy tøø jiäya'ayhaty.

⁷⁻⁸ Coo jaduhñ yhabáatnät coo Dios ja'a jäya'ay yajtøyhajtyega'añ nebiaty hajxy hänajty tøø quiädieeyän,

mänit hajxy jootcujc yhida'añ pønjatiä Dios piädaacy py hawa'adstuum, pønjatiä Dios miee'xyp,

pønjatiä piojhajpiä ja'a quiädieeyhajpiä hajxy yajñähwáatsäxä,

nømä David jecy miänaañ.

⁹ Jue'e ja'a David jecy ñänøøm cooc hajxy jootcujc yhida'añ, pønjatiä Dios piädaacy py hawa'adstuum, hopiønä, møødä judíoshajxy, ja'a Dios quiu'ughajpiä, møødä cajpä judíoshajxy.

Je'edshajxy ca'a cu'ughájtäp ja'a Dios. Hix, jaduhñ myiñ cúaay maa ja'a Diosmädia'aguiän: “Coo ja'a Abraham ja'a Dios miädia'agy miäbøjcä cooc ja'a Dios mänaa quia'a hõhnda'agy, paady piädaacä hawa'adstuum.”

¹⁰ Hoorä, jaduhñä judíoshajxy quiuhdujthaty, yajcircuncidarhajpä ya'adiøjc-hajxy. Jaduhñ miädia'agytiägø'øy coo hijxtahñd hajxy piädáacäxä maa ja'a ñi'xcøxpajxiän. Hoorä ja'a Abraham, tøøyyäm hánajty je'e piädáacänä hawa'adstuum, cajnä hijxtahñd hánajty jaduhñ piädáacäxä maa ja'a ñi'xcøxpän. Jaduhñä tøyhajt hajxy nmøødhájtäm coo häna'c-hajxy piäda'agyii hawa'adstuum je'eguiøxpä coo ja'a Dios miädia'agy hajxy miäbøjcä cooc ja'a Dios yajtøjiaty waambaty je'e tøø quiapxy tøø miädia'agy, hoyyä hijxtahñd hajxy quia'a jagä møødä maa ja'a ñi'xcøxpajxiän.

¹¹ Paadiä Abraham hijxtahñd jaduhñ piädáacäxä maa ja'a ñi'xcøxpän, jaduhñ yajnajuø'øy coo ja'a Abraham hánajty tøø piäda'agyii hawa'adstuum. Paady jim piädaacä coo ja'a Dios ja'a miädia'agy hánajty tøø miäbøjcäxä. Jaduhñä Abraham piädaactsohñä hawa'adstuum, hoyyä hijxtahñd hánajty jaduhñ quia'a jagä pädaacäxänä maa ja'a ñi'xcøxpän. Pønajaty jaduhñ mäbøjp nebiä Abraham jecy miäbøjquiän, jaanä jaduhñ hajxy yhixáanäbä ja'a Dios nebiä Dios ja'a Abraham jecy yhijxiän, hoy hajxy quia'a jagä judíospä. Coo hajxy jaduhñ nmäbøjcam nebiä Abraham jecy miäbøjquiän, jaduhñ quiähxø'øgy coo ja'a Abraham hajxy nhøjxhájtäm ndecyhájtäm.

12 Højts judíosahajxy, højtsä Abraham jecy nhaphajt ndeedyhajt. Jaaya'ay jaduhñ pädaactsohnä hawa'adstuum je'eguiøxpä coo jaduhñ miäbøjcy coo ja'a Dios yajtøjiaty waambaty hänajty tøø quiapxy tøø miädia'agy. Tøyhajt jaduhñ. Højts judíos, jaduhñ højts nyajcircuncidarhaty nebiä Abraham jecy yajcircuncidarhajtjän. Pero tøyymä Abraham ja'a Dios ja'a miädia'agy hänajty miäbøjcä, cahnä hänajty yajcircuncidarhaty. Højts judíos, højts jaduhñ mäßøjpä, jaanä jaduhñ højts nmäßøjpä nebiä Abraham jecy miäbøjquiän. Jaduhñä tøyhajt hajxy nmøødhajtäm coo højtsä Abraham jecy nhøjxhajty ndecyhajty, coo højts jaduhñ nmäßøcy, højts judíos.

13 Jéquiänä Dios ja'a Abraham ñämaayy cooc hänajty yaa miähane'ema'añ hädaa yaabä naaxwiin näguipxy møødä yhap møødä yhoc. Ja'a Dios jaduhñ mänaañ. Paadiä Abraham jaduhñ ñämaayyä je'eguiøxpä coo ja'a Abraham ja'a Dios miädia'agy hajxy miäbøjcä, ca'a jie'eguiøxpä cooc tyijy ja'a Abraham jia cudiuuñ nebiaty hänajty tøø yhane'emyii. Pero coo ja'a Abraham jaduhñ miäbøjcy coo ja'a Dios yajtøjiaty waambaty hänajty tøø quiapxy tøø miädia'agy, paadiä Abraham jaduhñ ñämaayyä coo ja'a Abrahamhajxy hänajty yaa miähane'ema'añ hädaa yaabä naaxwiin, møødä yhaphajxy, møødä yhoc-hajxy.

14 Haa ca'a, jaduhñä Dios miänaañ cooc hajxy yaa miähane'ema'añ hädaa yaabä naaxwiin pønjaty jaduhñ mäßøjp coo ja'a Dios yajtøjiaty waambaty hänajty tøø miäna'añ. Jaduhñ miädia'agytiägø'øy coo ja'a Dios ja'a hoybä

weenbä hajxy xmio'owáanäm je'eguiøxpä coo hajxy jaduhñ nmäbøjcäm. Pero coo ja'a hoybä weenbä hajxy häxøpy nbáatäm je'eguiøxpä coo ja'a jecymiädia'agy hajxy hoy ngudiúunäm, ja'a Moisés jecy quiujáhyyäbä, cab jaduhñ cu choobaaty coo ja'a Dios hajxy jaduhñ tøø xñámáayyäm coogä mayhajt hñajty tiuna'añ coo ja'a hoybä weenbä hajxy xmio'owáanäm. Ni jaduhñ cu quia'a tsoobaaty coo højts cu nmäbøjcäm coo ja'a Dios jaduhñ yajtøjiaty waambaty tøø quiapxy tøø miädia'agy.

15 Hix, cabä jecymiädia'agy hajxy hoy ngudiúunäm, ja'a Moisés jecy quiujáhyyäbä. Coo hajxy jaduhñ nga'a cudiúunäm, paady hajxy ngädiéhyyäm. Y paady jaduhñ yhahixø'øy coo hajxy ngumädóowämät. Pero pønjaty ja'a jecymiädia'agy tøø quia'a mäday, ja'a Moisés jecy quiujáhyyäbä, cab hajxy jaduhñ quiumädowa'añ, hoy hajxy tøø quia'a jagä tuñ nebiä Moisés jecy yhanehmiän.

16 Coo ja'a Abraham jaduhñ jecy miäbøjcä ja'a Dios miädia'agy coo ñämaayyä coogä Abrahamhajxy hñajty yaa miähane'ema'añ hädaa yaabä naaxwiin, møødä yhap møødä yhoc-hajxy, paadiä tøyhajt hajxy nmøødhájtäm coo ja'a Dios ja'a hoybä weenbä hajxy nägøxiä xmio'owáanäm nä'ä mayhajt, coo ja'a Abraham hajxy nbamäbøjcämät coo ja'a Dios yajtøjiaty waambaty tøø miäna'añ, møød højts judíos, møød mijts ca'a judiøspä. Coo ja'a Abraham hajxy jaduhñ nbamäbøjcämät, jaduhñ mäwiin hajxy nägøxiä xyajmábáatäm nebiä Abraham hajxy

xyhaphájtäm xyhoc-hájtäm. Jaduhñ quiähxø'øgy coo ja'a Abraham hajxy nhøjxhájttäm ndecyhájttäm.

17 Hix, jaduhñ jim myiñ cujaay maa ja'a Diosmädia'aguiän cooc ja'a Dios ja'a Abraham piädaacy coo ja'a jäya'ayhajxy mayhagajtpä yhaphat yhoc-hadøøjät ja'a Abraham. Y miäbøjc ja'a Abraham jaduhñ coo jaduhñ ñämaayyä coogä tio'oxiøjc hänäjty quio'na'awa'añ, hoy hajxy hänäjty tøø jia miäjaanä. Paadiä Abraham jaduhñ miäbøjcy, ñajuøøby hänäjty jaduhñ coo ja'a Dios mäjaa miøødä coo ja'a ho'oguiäya'ay yagjujypiøjtägätsät, y coo mäjaa miøødäbä coo ja'a jäya'ay quiunúu'xät ja'a hajxy hänäjty ca'a miimb ca'a cahbnä. Y coo ja'a Abraham hajxy jaduhñ nbamäbøjcam, jaduhñ mäwiin hajxy nmäbáatäm nebiä Abraham hajxy xyhaphájtäm xyhoc-hájtäm. Jaduhñ quiähxø'øgy coo ja'a Abraham hajxy nhøjxhájttäm ndecyhájttäm.

18-21 Coo ja'a Dios ja'a Abraham jaduhñ jecy ñämaayy coogä mayhagajtpä-jäya'ayhajxy hänäjty yhaphada'añ tieedyhada'añ ja'a Abraham, tøø ja'a Abrahamhajxy hänäjty miäjaanä møødä tio'oxiøjc. Mägo'x-jomøjtä Abraham hänäjty miøødä. Y ja'a tio'oxiøjc, ja'a Sarahajpä, cahnä hänäjty ñä'ägädä huungpaadyñä, hoyyä jomøjt hänäjty tøø jia nøcxnä coo yhuungpáadät. Pero cabä Abraham jaduhñ ñä'ägädä møjpädaacy coo hajxy hänäjty tøø miäjaanä. Hamuumdu'jootä Abraham jaduhñ miäbøjcy nägø'ø nädecypiä neby hänäjty tøø ñäma'ayijän ja'a Diósäm coog hänäjty jäya'ay may yhaphat yhoc-hada'añii. Paady jaduhñ tiøjiajty. Jaduhñ jim myiimbä cujaay maa ja'a Diosmädia'aguiän cooc ja'a Abraham yhap

yhoc-hajxy hānajtj jiaanč tehṃ miayø'øwa'añ. Paadiä Abraham jaduhṃ miäbøjcy, ñajuøøby hānajtj jaduhṃ coo ja'a Dios mäjaa miøødä coo jaduhṃ yajtøjiädät waambaty hānajtj tøø quiapxy tøø miädia'agy. Mānitä Abraham ja'a Dios jaduhṃ miøjpädaacy jiaančhpädaacy.

²² Coo ja'a Abraham jaduhṃ miäbøjcy, paady hawa'adstuum piädaacä.

²³ Jaduhṃ jim myiñ cujaay maa ja'a Diosmädia'aguiän coo ja'a Abraham piädaacä hawa'adstuum je'eguiøxpä coo ja'a Dios miädia'agy miäbøjcäxä coogä Dios yajtøjiaty waambaty tøø quiapxy tøø miädia'agy.

²⁴ Jaanä jaduhṃ højtsä Diosmädia'agy xñänøømämbä. Coo ja'a Dios ja'a miädia'agy hajxy jaduhṃ nmäbøjcämbät, jaduhṃä Dios hajxy xpiädäacämbät hawa'adstuum, je'eguiøxpä coo ja'a Dios ja'a Jesucristo yagjujypiøjtägajch. Ja'a Jesucristo, je'e hajxy nWiindsøñhåjtäm.

²⁵ Jaaya'ay jaduhṃ nähdujcä coo hajxy xñähho'túutäm. Jaduhṃä nbojphåjtäm ja'a ngädieeyhåjtäm hajxy xyajnhwáatsäm. Y coo ja'a Jesucristo jaduhṃ yagjujypiøjtägajtsä, jaduhṃ hajxy nmähmøøyyänä hawa'adstuum.

5

¹ Hoorä, coo hajxy nmäbøjcäm coo ja'a Jesucristo hajxy tøø xñähho'túutäm, paadiä Dios hajxy tøø xyajnhwáatsäm ja'a nbojphåjtäm ja'a ngädieeyhåjtäm. Paady hajxy xpiädäacäm hawa'adstuum. Jootcujcä Dios hajxy jaduhṃ xmiøødhåjtäm.

2 Coo ja'a Jesucristo hajxy jaduhñ tøø xñähho'túutäm, coo je'e jiuypiojtägajch, paadiä Dios hajxy xquiumáayyanä. Paady hajxy nxoondáacäm. Y coo jaa tøyhajt hajxy jaduhñ nmøødhájtäm coo ja'a Dios hajxy jim xyajnøcxáañäm maa ja'a wyiinduumän, paady hajxy jootcujc nhíjtäm.

3-4 Jaaná jaduhñduhmbä, xoondáacäm hajxy hädaa yaabä naaxwiin, hoy hajxy yaa nja tsaaçhpójcäm. Coo hajxy nmee'xtújcämät, jaduhñä Diosmädia'agy hajxy hoy ngudiúunämät. Y coo hajxy jaduhñ hoy ngudiúunämät, jaduhñä tøyhajt hajxy nmøødhadáañäm coo ja'a Dios hajxy jim xyajnøcxáañäm maa ja'a wyiinduumän. Coo hajxy jaduhñ nnajuóøyyäm coo hajxy jim xyajnøcxáañäm, paady hajxy yaa nxoondáacäm, hoy hajxy yaa nja tsaaçhpójcäm.

5 Coo ja'a Dios jaduhñ miäna'añ coog hajxy jim xyajnøcxáañäm maa ja'a wyiinduumän, yejpiä Dios ja'a tøyhajt jaduhñ. Cab hajxy jaduhñ xwyi-inhóhnäm. Hix, tøø ja'a Dioshespíritu hajxy xy-hadägøøyy xjiottägøøyyäm. Jaduhñ hajxy xya-jnajuóøyyäm coo hajxy xjiaançh tehñ chójcäm hamuumdu'joot.

6 Coo ja'a Dios yajnähdiy coo hänäjty tøø yhabaatnä, mänitä Jesucristo hajxy hoy xñähho'túutäm. Jaduhñä nbojhájtämä ngädieyhájtäm hajxy xyajnáhwáatsäm. Cab hajxy hänäjty hoy nnähwa'adsáañäm hamdsoo je'eguiøxpä coo hajxy hänäjty ngahwiindøyhájtäm.

7 Hix, caj miich pøn xchoj nähho'tú'udät, hoy miich hänäjty mja hojiäya'ayhaty.

8 Pero ja'a Dios hajxy xjiaančh tehṃ chójcäm, paadiä Jesucristo hajxy hoy xñähho'túútäm, hoy hajxy hánajty nja cuboj nja cugädieeyhájtäm.

9 Hoorä, coo ja'a Jesucristo hajxy tøø xñähho'túútäm, coo ja'a Dios hajxy tøø xpiädáacäm hawa'adstuum, jaduhñä tøyhajt hajxy nmøødhájtäm coo ja'a Dios hajxy xquia'a yajcumädowáañäm.

10 Coo hajxy hijty cøxypänejiä njäya'ayhájtäm, jaduhñ mäwiin hijty píaady néjjiäm coo ja'a Dios hajxy hijty nmädsiphájtäm. Pero coo ja'a yHuung Jesucristo hajxy hoy tøø xñähho'túútäm, ja'a hajxy nWiindsøñhájtämbä, paady cabä Dios hajxy nmädsiphájtänä. Hoyyä Dios hajxy xyhuunghájtänä. Tu'ugjoot tu'ugwiinmahñdiä Dios hajxy nmøødhájtänä. Y coo ja'a Jesucristo jiuypiojtägajch, coo jim ñøcxtägajch maa ja'a Tieediän, jaduhñä tøyhajt hajxy nmøødhájtäm coo hajxy jim xyajnøcxáañämbä.

11 Jaduhñä tøyhajt hajxy nmøødhájtämbä coo ja'a Dios hajxy xquiumáayyänä. Paady hajxy jaduhñ xquiumáayyänä coo ja'a Jesucristo ja'a nbojpä ngädieey hajxy tøø xyajnähwáatsäm. Tsøcxä hajxy jaduhñ xoondáacäm.

12 Hoorä, tu'jäya'ay jecy quia'a cudiuundsohñ neby hánajty tøø yhane'emyiijän ja'a Diósäm. Ja'a Adánhøch jaduhñ nnänøømby, ja'a hajxy jecy nhaphájtäm ndeedyhájtäm. Jaduhñä pojpa cädieey yaa chohñdaacy hádaa yaabä naaxwiin. Y coo ja'a Adán jaduhñ jecy quiädiehy, paady jaduhñ yhuuc ho'tsohmä. Y coo ja'a Adán hajxy jaduhñ jecy nhaphájtäm ndeedyhájtäm nägøxiä, paady hajxy

nbagädiéhyäm, paady hajxy nbahó'cäm.

¹³⁻¹⁴ Høxtä jecyjiäya'abiaady hajxy haxøøg jiäya'ayhajty, paady hajxy nägøxiä yho'cy, hoyyã Moisés hãnajty quia'a jagã miññã, quia'a jagã ca'ayñã, hoyyã Dios hãnajty quia'a jagã hane'emyñã coo ja'a jäya'ayhajxy hoy jiäya'ayhãdät nebiã Moisés jecy quiujahyyän, hoy hajxy hãnajty quia'a jagã pagädiehbiã nebiã Adán hãnajty tøø quiädieeyän. Hoyyã Dios hãnajty quia'a jagã hane'emyñã coo ja'a jäya'ayhajxy hoy jiäya'ayhãdät, nägøxiä jäya'ayã pojpa cãdieey hajxy hãnajty miøødã. Y ja'a Adán, jaduñ je'e jecy ñãmaayyã cooc hãnajty yho'oga'añ, pø cab hãnajty jaduñ quiudiuna'añ nebiã Dios hãnajty tøø yhane'emiän. Y coo ja'a Moisés jaduñ cujecy quiujahy nebiatiã Dios hãnajty tøø yhane'emiän, jaduñã jäya'ayhajxy nägøxiä ñãmáayyãbã coogã Adán hajxy hãnajty nägøxiä piaho'ogaambã, pø cab hajxy hãnajty quiudiuna'añ nebiã Dios hãnajty tøø yhane'emiän. Ja'a jecyjiäya'ayhajxy hãnajty jiiã, cahnã Moisés hãnajty quiujaayñã nebiatiã Dios hãnajty tøø yhane'emy, cab hajxy hãnajty jaduñ nämay ñajuø'øy coo hajxy hãnajty yho'oga'añ, pø haxøøg hajxy hãnajty jiäya'ayhaty.

¹⁵ Coo ja'a Adán ja'a Dios miãdia'agy jaduñ jecy quia'a cudiuunã, paady hajxy nägøxiä nhó'cäm. Pero coo ja'a Jesucristo ja'a Tieddiã miãdia'agy jaduñ quiudiuunã, paady hajxy nnähwaats nguhwáatsäm. Coo ja'a Jesucristo hajxy jaduñ hoy xñãhho'túutäm, paadiã Dios hajxy xpiädáacäm hawa'adstuum. Møjmayhajtã Dios jaduñ tiuun maa højtshãjtäm, pønãtiã miãdia'agy tøø miãbøjcã ja'a Jesucristocøxpã. Paady hajxy jim

xyajñøcxáañäm maa ja'a wyiinduumän.

¹⁶ Coo ja'a Jesucristo hajxy hoy tøø xñähho'túutäm, jaduñnä tøyhajt hajxy nmøødhájtäm coo ja'a nbojpä ngädieey hajxy jaduñ xyajñähwáatsäm nägøxiä, pønjaty tøø miäbøcy ja'a Jesucristocøxpä. Paadiä Dios hajxy xpiädáacäm hawa'adstuum. Paady hajxy jim xyajñøcxáañäm maa ja'a wyiinduumän.

¹⁷ Jaduññds je'e, coo ja'a Adán ja'a Dios miädia'agy jecy quia'a cudiuunä, paady hijty yhawiinmatsä coo ja'a Dios hajxy xpiädáacämät haxøøgtuum. Pero tøø ja'a Jesucristo hajxy xyajñähwaats xyajcuhwáatsäm. Møjmayhajtä Dios jaduñ tiuun. Paadiä Dios hajxy xquia'a päda'agáañäm haxøøgtuum, pønjaty hawa'adstuum. Y paady højtsä hoyhajtä weenhajt yaa nbaadáañäm hädaa yaabä naaxwiin je'eguiøxpä coo ja'a Jesucristo hajxy tøø xyajñähwaats tøø xyajcuhwáatsäm.

¹⁸⁻¹⁹ Mänaa ja'a Jesucristo yaa yhitiän hädaa yaabä naaxwiin, ca'xiä Tieediä miädia'agy quiudiuunä mäduhñtiä yaa yhijty. Y coo hajxy jaduñ xñähho'túutäm, ja'a Tieediä miädia'agy jaduñ quiudiuunä. Jaduñ hajxy xyajñähwáatsäm. Coo hajxy jaduñ nmäbøjcämät coo ja'a Jesucristo hajxy tøø xjiaançh nähho'túutäm, mänitä Dios hajxy xpiädáacämät hawa'adstuum. Hoorä, ja'a Adán, haxøøg je'e jecy jiäya'ayhajty. Cabä Adán ja'a Dios miädia'agy jecy ñä'ägädä cudiuunä. Y coo ja'a Adán hajxy jecy nhaphájtäm ndeedyhájtäm, paadiä Dios miädia'agy hajxy nga'a nä'ägädä cudiunáañämbä. Coo hajxy jaduñ nga'a

cudiunáanäm, paady hijty yhawiinmatsä coo ja'a Dios hajxy jiīby cu xpiädáacäm haxøøgtuum. Pero coo ja'a Jesucristo hajxy tøø xñähho'túutäm, paady hajxy jim̄ xyajnøcxáanäm Dioswiinduum. Jaduhñä Dios mayhajt mõj jiaanč tehñ tiuuñ maa højtshájtäm.

²⁰⁻²¹ Coo ja'a Dios jecy yhanehmy coo ja'a jäya'ayhajxy hoy jiäya'ayhädät, mänitä Moisés jaduhñ quiujahy. Y coo ja'a nocy hajxy ngápxämät, ja'a Moisés jecy quiujáhyyäbä, jaduhñ hajxy nnajuøøyyämät coo hajxy njaanč cädiéhyäm. Hoy hajxy jaduhñ nja najuøøyyäm, cab hajxy nmäbøjcäm. Pero xjiaanč tehñ ñäxúu'tsämä Dios. Paadiä mõjmayhajt jiaanč tehñ tiuuñ maa højtshájtäm. Jaduhñds je'e, coo hajxy ngädiéhyäm, paady hajxy nhó'cäm. Pero coo ja'a Dios hajxy xñäxúu'tsäm, paadiä Jesucristo hajxy hoy xñähho'túutäm, ja'a hajxy nWiindsønähájtämbä. Jaduhñä Dios hajxy xpiädáacäm hawa'adstuum. Mänit hajxy xyagjugyhadáanäm cøjxta'axiøø nebiä Dios jiugyhatiän.

6

¹ Cab jaduhñ ñä'ägädä hahixø'øy coo hajxy nmänáanämät: “Tsøg hajxy cädiéhyäm tehngajnä. Haa ca'a, tehngajnä Dios hajxy xñäxuudsáanäm.”

² Caj pues, cab jaduhñ yhahixø'øy coo hajxy tehngajnä ngädiéhyämät. Haa ca'a, tøø ja'a pojpä cädieey hajxy nnajtshixøøyyänä coo ja'a Diosmädia'agy hajxy tøø nmäbøjcäm ja'a Jesucristocøxpä.

³⁻⁵ Tøgä cab hajxy mnajuø'øyä coo ja'a Jesucristo hajxy nmøødhájtäm tu'ugjoot

tu'ugwiinmahñdy coo hajxy tøø nnäbéjtäm ja'a Jesucristocøxpä. Y coo hajxy jaduñ tøø nnäbéjtäm ja'a Jesucristocøxpä, jaduñ mäwiin piaady néjjiämä Jesucristo hajxy häxøpy näguipxy tøø nmøødhó'cäm. Jaaná jaduñ mäwiin piaatpä néjjiämä Jesucristo hajxy häxøpy näguipxy tøø nmøødnaaxtägóøyyäm. Coo ja'a pojpä cädieey hajxy tøø nnajtshixóøyyänä, jaduñ miädia'agytiägø'øy coo hajxy jaduñ ween nga'a jatcøøyyänä haxøøg. Y coo ja'a Dios ja'a Jesucristo yagjuypiøjtägajch ja'a miäjaahaam, mänitä Jesucristo jugyhajt hawiinjemybiä miøødhajty. Jaaná jaduñ højtshájtämbä, coo hajxy nnäbéjtäm, jaduñ mäwiin piaady néjjiämä Jesucristo hajxy häxøpy näguipxy tøø nmøødjuypiøjtägájtäm. Paadiä jugyhajt hajxy hawiinjemybiä nmøødhájtämbä. Tøyhajt jaduñ. Jaduñnä hojiootä howyiinmahñdy hajxy nmøødhájtämät. Jaduñnä miädia'agytiägø'øy coo ja'a Dios hajxy xyagjugyhadaañäm cøjxta'axiøø neby je'e jiugyhatiän.

⁶ Coo ja'a Jesucristo hajxy tøø xñähho'túutäm cruzcøxp, mänitä nhaxøøgwiinmahndyhajxy quiuhdägóøyyänä nebiä haxøøgwiinmahñdy hajxy nägøxiä hijty nmøødhájtäm. Coo ja'a nhaxøøgwiinmahñdyhajxy jaduñ quiuhdägóøyyänä, paadiä Jesucristo hajxy nmøødhájtänä tu'ugjoot tu'ugwiinmahñdy. Paady hajxy jaduñ tøø xñähho'túutäm, jaduñnä nhaxøøgwiinmahñdyhajxy jaduñ quiuhdägóøyyänä. Jaduñnä njoot hajxy nga'a pädáacänät maa ja'a haxøøgpän.

7 Põnä Jesucristo hānajt̃y mōōdhj̃p tu'ugjoot tu'ugwiinmahñdy mānaa ja'a Jesucristo yho'oguiān, cabā jioot piādaacnā maa ja'a haxōōgpān.

8 Coō hajxy nmābōjcam coo ja'a Jesucristo hajxy jaduhñ tōō xñāhho'túutām mōōd coo jadāhooc jiuyp̃iōjcy, jaduhñ māwiin miābaady néjjiām coo ja'a Jesucristo hajxy hāxōpy nāguipxy tōō nmōōdjuyp̃iōjcam. Paady hajxy jaduhñ njugyhadaānām cōjxta'axiōō neby je'e jiu gyhatiān.

9 Coō ja'a Jesucristo jiuyp̃iōjtāgajch, cab jaduhñ mānaa yho'tāgatsaanā. Homiānaaxōōjā homiānaadsuujā jiu gyhada'añ. Tōyhajt jaduhñ.

10 Hix, tāhoocnāhho'tu'utiā ja'a Jesucristo hajxy xñāhho'túutām. Jaduhñā nbojpa ngādieey hajxy tōō xyajnāhwáatsām. Y coo ja'a Jesucristo tōō jiuyp̃iōjtāgajtsnā, paady homiānaaxōōjā homiānaadsuujā ja'a Dios miōōdhidaānā.

11 Jaanā jaduhñ hōjtshájtāmbā, coo ja'a Jesucristo hajxy nmōōdhíjtānā tu'ugmādia'agy, tsōg hajxy jahmiejtstāacām coo ja'a nhaxōōgwiinmahñdyhajxy tōō quiuhdāgōoyyānā. Jaduhñ hajxy tsōc jahmiejtstāacāmbā coo hawiinjemybiā jugyhajt hajxy nmōōdhíjtānā nebiā Jesucristo hānajt̃y miōōdhatiān mānaa jiuyp̃iōjtāgachān. Paadiā Dios hajxy nmōōdhíjtāmbā tu'ugmādia'agy.

12 Cab hajxy cōxypānejpiā tsōc jatcōōyyānā. Cabā njootā ngopc hajxy nbādāacānāt maa ja'a haxōōgpān.

13 Cabā ngō'ō ndecy hajxy nyaghanájxānāt, ni ja'a nhaawhájjtām. Tsōgā Diosmādia'agy

hajxy hamuumdu'joot cudiúunäm. Coo ja'a Jesucristo hajxy hánajty nmøødhjítäm tu'ugjoot tu'ugwiinmahñdy mänaa yho'oguiän, møød mänaa jiuypiojtägachän, paadiä Dios hajxy nmøødhjítänä tu'ugjoot tu'ugwiinmahñdy.

14-15 Paadiä Dios hajxy xquiumáayyäm coo mayhajt tøø tiuñ maa højtshjítäm, ca'a jie'eguiøxpä coo ja'a mädia'agy hajxy nja wili quiudiunáanäm, ja'a Moisés jecy quiujáhyyäbä. Coo ja'a Dios mayhajt jaduhñ tiuñ maa højtshjítäm, je'ech jaduhñ nnänøømby coo hajxy xyajnähwaats, coo hajxy xyajcuhwáatsäm. Hoyyä Dios mayhajt jaduhñ tiuñ maa højtshjítäm, cab jaduhñ ñä'ägä hahixø'øy coo hajxy haxøøg njatcøøyyämät tehñgajnä.

16 Tsøg hajxy paquiä mädiáacäm neby hajxy yaa nguhdujthjítäm hädaa yaabä naaxwiin. Jaduhñä cuhdujt hajxy nmøødhjítäm coo hajxy nwiimbíiwämät pøn jaduhñ nmädunáanäm. Y jaduhñ hajxy ngudiúunäm nebiatiä nwiindsøn'hjítäm hajxy xyhanéhäm. Jaanä jaduhñä cuhdujt hajxy nmøødhjítämbä coo hajxy nwiimbíiwämät mädyii hajxy nyajtunáanäm, ja'a Diosmädia'agy, o ja'a nhaxøøgwiinmahñdyhájítäm. Coo ja'a Diosmädia'agy hajxy nyajtuúnämät, mänitä Dios hajxy jaduhñ xquiumáayyämät. Pero coo ja'a nhaxøøgwiinmahñdy hajxy nyajtuúnämät, cabä Dios hajxy jaduhñ nmøødhjítämät tu'ugjoot tu'ugwiinmahñdy. Mänitä Dios hajxy xpiädáacämät haxøøgtuum. Tøyhajt jaduhñ.

17 Dioscujú'uyäp ja'a Dios coo mijsä Diosmädia'agy hamuumdu'joot myajtuunnä neby

hajxy tøø mmäbøquiän. Cahnä Diosmädia'agy hajxy mmädoyñä, haxøøg hajxy hijty mjäya'ayhaty.

18 Coö mijts tøø mmäbøcy coö ja'a Jesucristo hajxy tøø xñähho'túutäm, paadiä mhaxøøgwiinmahñdy hajxy tøø mnajtshixøøñä. Tøø ja'a mjoot hajxy mbäda'agy coö hajxy hamuumdu'joot mhojiäya'ayhájñät.

19 (Páadyhöch jaduñ nmädia'agy neby hajxy yaa nguhdujthájtäm hädaa yaabä naaxwiin, jaduñ hajxy hoy mwiinjuø'øwät. Cab hajxy jaduhyä hoy mwiinjuø'øwa'añ.) Hijty, jaanč tehñ yhaxøøgjaty hajxy hijty mjäya'ayhaty. Cøxypänejpiä hajxy hijty mjaanč tehñ jiatcø'øy. Maas hanaxiä hajxy hánajty mjatcø'øwa'añ tehñgajñä. Pero tøø ja'a Diosmädia'agy hajxy mmäbøjnä ja'a Jesucristocøxpä, paadiä Diosmädia'agy hajxy myajtúunnät nägø'ø nädecypiä.

20 Coö ja'a mhaxøøgwiinmahñdy hajxy hijty mya-jtuñ, cabä mjoothajxy hijty chocy coö hajxy hoy mjäya'ayhádät. Coö hajxy häxøpy tøø mhojiäya'ayhaty, tøø ja'a Dios hajxy häxøpy xquiumay.

21 Höchähdiuunnä hajxy hijty mjatcø'øy. Cabä tii hoybä hajxy hijty mbaady. Haxøøgtuum hajxy hijty mnä'ägädä häda'aga'añ.

22 Paadiä Jesucristo hajxy tøø xñähho'túutäm, coö ja'a mhaxøøgwiinmahñdy hajxy jaduñ mnajtshixø'øwät. Tøyhajt jaduñ. Paadiä Jesucristo hajxy mmøødhijnä tu'ugjoot tu'ugwiinmahñdy. Coö ja'a mjoot hajxy hamuumdu'joot tøø mbäda'agy coö ja'a Dios

hajxy mmøødtuna'añ, paadiä hoyhajtä weenhajt hajxy mbaada'añ. Jaduhñ miädia'agytiägø'øy, coo mijtsä Dios hoyhäna'c xyagjada'añ nebiä Jesucristo yhoyhäna'c-hatiän, paadiä Dios hajxy xyagjugyhada'añ cøjxta'axiøø neby je'e jiugyhatiän.

²³ Coo hajxy cøxypänejpiä njatcøøyyämät, cabä Dios hajxy jaduhñ nmøødhjätämät tu'ugmädia'agy, møød haxøøgtuum hajxy nhädaacämät. Pero tøø ja'a Dios mayhajt tiuñ coo ja'a yHuung hajxy yaa tøø xyajnäguéjäm, ja'a Jesucristo, ja'a hajxy nWiindsøn'hjätämbä. Hoyyä Jesucristo hajxy tøø xñähho'túutäm. Jaduhñä Dios hajxy xpiädaacäm hawa'adstuum. Coo hajxy jaduhñ nmäbøjcämät, mänitä Dios hajxy xyagjugyhjätämät cøjxta'axiøø neby je'e jiugyhatiän.

7

¹ Mägu'ughajpädøjc, mnajuøøby hajxy jaduhñ nebiä cuhdujt yaa myiñ hädaa yaabä naaxwiin. Ja'a häna'c-hajxy møjcuhdujtmøødpä, ja'a häna'c hajxy jaduhñ xyhanéhmäm mäduhñtiä hajxy yaa njugyhjätäm, túhmäts. Pero coo hajxy nhó'cänä, cab hajxy jaduhñ xyhanéhmänä.

²⁻³ Høxtahmäsä to'oxiøjc ja'a ya'adiøjcmøødpä, jaduhñä cuhdujt myiñ coo hajxy ñimiøødtsäna'awøøjät mäduhñtiä hajxy nämetsc jiugyhaty. Hoorä, coo ja'a to'oxiøjc wiingya'adiøjc miøødtsänä'awät, y je'enä ñihyhap jiugyhatyñä, haxøøgä to'oxiøjc jaduhñ jiatcø'owät. Hix, cabä cuhdujt jaduhñ myiñ coo jaduhñ jiatcø'owät. Pero coodsä ñihyhap yhó'ogät, mänitä quixy cuhdujt miøødänä coo piøjtägätsät, y cab jaduhñ ñejpiä.

⁴Hoorä, mägu'ughajpädøjc, coo mijtsä Jesucristo hänajty mmøødhity tu'ugjoot tu'ugwiinmahñdy mänaa yho'oguiän, paadiä jecymiädia'agy hajxy xquia'a hanehmñä, ja'a Moisés jecy quiujáhyyäbä. Jaanä jaduñduhmbä, tu'ugjoot tu'ugwiinmahñdiä Jesucristo hajxy hänajty mmøødhíjtäbä mänaa jiuypiojtägachän. Tøø ja'a mjoot hajxy mbäda'agy coo jaaya'ay hajxy mmøødtúnät. Jaduhñä Dios hajxy mmøødtúumbät.

⁵Cahnä hajxy hänajty nmäbøjcam coo ja'a Jesucristo hajxy hoy xñähho'túutäm, jaduñä njoot hajxy hänajty nnä'ägädä pädáacäm coo hajxy hänajty jaduñ njatcø'øwáañäm hoñejpiä. Paady hajxy hijty nhäda'agáañäm jiiby mõjcu'uhaam. Jaançh tehñ yhaxøøg hajxy hänajty nwiinmahñdyhajtäm. Hoyyä mädia'agy hajxy hänajty nja mädóowäm, ja'a Dios ja'a Moisés jecy ñajtscapxøøyyäbä, cab hajxy hänajty nyajtunáañäm.

⁶Cahnä Diosmädia'agy hajxy hänajty nmäbøjcam ja'a Jesucristocøxpä, tehñgajnä ja'a jecymiädia'agy hajxy hänajty nja wi'i quiudiunáañäm, ja'a Moisés jecy quiujáhyyäbä. Jadúñäc tyijy hajxy hänajty nnähwa'adsáañäm. Pero coo ja'a Jesucristo hajxy tøø xñähho'túutäm, paadiä jecymiädia'agy jaduñmbä xquia'a hanéhmñä. Coo ja'a Jesucristo hajxy tøø xyajñähwáatsäm, jaduñ hajxy xyagjugyhadáañäm cøjxta'axiøø neby jaaya'ay jiugyhatiän. Y xpiuhbéjtämä Dioshespíritu hajxy nebiä Dios hajxy hoy nmøødtúunämät.

⁷⁻⁹Cáhnøchä jecymiädia'agy hänajty nmädoyñä, ja'a Moisés jecy quiujáhyyäbä, cábøch hänajty nnajuø'øy cooçh hänajty hoy nga'a jäya'ayhaty.

Pero cooch jecymiädia'agy jaduñ nwiinjuoõñä, páadyhøch nnajuoõñä cooch cøypänejpiä njatcø'oy hoñejpiä. Coochä haxøøgwiinmahñdy jaduñ njaanč tehñ miøødä, páadyhøchä njoot hijty chocy cooch cøypänejpiä njatcø'owät hoñejpiä nebiatiä jecymiädia'agy hajxy xjia hanéhñäm coo hajxy nga'a jatcø'oyyämät, ja'a Moisés jecy quiujáhyyäbä. Y coochä jecymiädia'agy jaduñ nmädoy, maas hanáxiøch cøypänejpiä njaac jatcø'oy tehñgajñä. Páadyhøchä tøyhajt nmøødä cooch hijty nga'awa'añ haxøøgtuum.

10 Hóyhøch ndijy jaduñ ngudiuna'añ ja'a jecymiädia'agy, ja'a Moisés jecy quiujáhyyäbä. Y cooch häxøpy hoy ngudiuñ, hawa'adstúumhøchä Dios cu xpiädaacy. Pero cábøchä jecymiädia'agy jaduñ hoy nnä'ägädä cudiuna'añ, páadyhøch hawiinmats nhädá'agät haxøøgtuum.

11 Hoy ndíyhøchä jecymiädia'agy hänajty nyajtuna'añ, ja'a Moisés jecy quiujáhyyäbä. Jaduñ ndíyhøchä Dios ja'a hoyhajtä weenhajt xmio'owa'añ. Pero cábøchä tøyhajt hänajty nnä'ägä møødä. Coochä haxøøgwiinmahñdy hänajty nmøødä, páadyhøchä jecymiädia'agy hänajty hoy nga'a yajtuñ, ja'a Moisés jecy quiujáhyyäbä. Páadyhøch hänajty nga'awa'añ haxøøgtuum.

12 Ja'a jecymiädia'agy ja'a Moisés jecy quiujáhyyäbä, je'e hajxy xyhanéhñäm coo hajxy hoy njäya'ayhajtämät. Jaduñ miädia'agy neby hajxy hoy njäya'ayhajtämät. Xyajnajuøoyyäm hajxy jaduñ coo ja'a Dios howyiinmahñdy jiaanč tehñ miøødä.

13 Paadia jecymiädia'agy jaduñ yhooyä, ja'a Moisés jecy quiujáhyyäbä. Pero hóyhøch hänajty tøø nja mädoy, tehngájnoch hänajty haxøøg nwi'i jiäya'ayhatyñä. Páadyhøch hijty jiiby nga'awa'añ haxøøgtuum. Hiḡ, cábočhä nwiinmahñdy hänajty yhooyä. Y coočhä jecymiädia'agy jaduñ nmädooyy, ja'a Moisés jecy quiujáhyyäbä, maas hanáxiøch hänajty haxøøg njatcø'owa'añ.

14 Jaduñnä tøyhajt hajxy nmøødhájtäm coo ja'a jecymiädia'agy hajxy xyhawáañäm coo ja'a Dios howyiinmahñdy jiaančh tehñ miøødä. Jaaná jaduñ hajxy xyhawáañämbä coo Dios ja'a jioot chocy coo hajxy hoy njäya'ayhájtämät. Pero højts, cab højts hoy nnä'ägädä jäya'ayhájtäm, je'eguiøxpä coo højts hädaa yaabä naaxwiimbä wiinmahñdy nmøødhájtäm. Hamdsoojoot hajxy jaduñ haxøøg njatcøøyyäm.

15 Jaduñnä njoothajxy jia wi'i chójcäm coo hajxy hoy njäya'ayhájtämät, pero cab hajxy nnä'ägädä jadáañäm hojiäya'ayhat. Pätiidä hajxy jaduñ coo nga'a jadáañäm. Cøxypänejpä hajxy nwi'i jiatcøøyyäm, hoy hajxy nja najuøøyyäm coo jaduñ yhaxøøgä.

16 Nnajuøøyyäm hajxy jaduñ coo ja'a jecymiädia'agy yhooyä, ja'a Moisés jecy quiujáhyyäbä. Jaduñnä njoothajxy jia tsójcäm coo hajxy ngudiúunämät nebiatiä jecymiädia'agy hajxy xyhanéhäm. Pero cab hajxy hoy nnä'ägädä cudiunáañäm.

17 Pero, ca'a yhamdsoojoot hajxy jaduñ haxøøg njatcøøyyäm. Ja'a nhaxøøgwiinmahñdy hajxy jaduñ xyagjatcøøyyäm haxøøg.

18-19 Cabä Diosmädia'agy hajxy hoy ngudiunáanäm hamdsoojoot, hoyyá njoothajxy jia tsójcäm coo hajxy ngudiúunämät. Haxøøg hajxy njatcøøyyäm, hoyyá njoothajxy jaduñ quia'a jagä tsójcäm coo hajxy jaduñ njatcøøyyämät.

20-21 Hix, ja'a nhaxøøgwiinmahñdy hajxy haxøøg xyagjatcøøyyäm, ca'a yhamdsoojootä.

22 Jaduñä Diosmädia'agy hajxy xyhanéhäm nebiaty hajxy hoy njäya'ayhájämät. Njoodóotyhøch ngopcóotyhøch jaduñ njuø'øy coo ja'a Diosmädia'agy jiaanç tehñ yhooyä.

23 Nnajuøøbiøch jaduñ coochä haxøøgwiinmahñdy njaanç tehñ miøødä. Páadyhøchä howyiinmahñdy hoy nga'a nä'ägädä yajtuna'añ. Hix, ja'a nhaxøøgwiinmáhñdyhøch haxøøg xyagjäya'ayhajp. Y cábøch hoy nnä'ägädä najtshixø'øwa'añ.

24 Cooch häxøpy pøn hoy xquia'a ya-jnähwa'adsa'añ ja'a nhaxøøgwiinmáhñdyhøch, cábøchä Dios häxøpy hoy nmøødhida'añ tu'ugjoot tu'ugwiinmahñdy. Jíbyhøch häxøpy nhäda'aga'añ møjcu'uhaam. Jaanç tehñ yhoñäxúu'tsnøch häxøpy nhity.

25 Pero nmóobiøchä Dios Dioscujú'uyäp coochä Jesucristo tøø xyajnähwa'açh, ja'a hajxy nWiindsønhájtämbä. Páadyhøchä Diosmädia'agy hoy nyajtuna'añ ja'a nhowyiinmahñdyháamhøch, hóyhøchä haxøøgwiinmahñdy nja møødnä. Je'eçh tähoocjaty haxøøg xyagjatcøøby.

8

1 Hoorä, hawa'adstuum hajxy nmähmøøyyänä coo ja'a Jesucristo hajxy nmøødhíjtäm

tu'ugmädia'agy. Jaduhñ hajxy ngudiúunäm nebiä Diosmädia'agy hajxy xyhanéhäm. Cab hajxy cøxpänejpiä njatcøøyyänä.

² Coo ja'a Jesucristo hajxy tøø xñähho'túutäm, paady hajxy xmiøødhíjtäm tu'ugjoot tu'ugwiinmahñdy. Paadiä Dioshespíritu hajxy xyagjyhadáanäm cøjxta'axiøø nebiä Dios jiugyhatiän. Paadiä Dios hajxy tu'ugjoot tu'ugwiinmahñdy xmiøødhidáanäm homiánaaja. Coo ja'a Jesucristo ja'a nhaxøøgwiinmahñdy hajxy tøø xyajnähwáatsäm, paady hajxy jiiby nga'a häda'agáanänä haxøøgtuum.

³⁻⁴ Coo ja'a Dios ja'a yHuung yaa quiejxy hädaa yaabä naaxwiin, jaduhñ yaa jiäya'ayhajty neby højtshájtäm. Jesucristo je'e. Pero cabä Jesucristo haxøøg jiäya'ayhajty neby højtshájtäm. Mänitä Jesucristo hajxy xñähho'túutäm. Hoyyä Jesucristo ja'a jecymiädia'agy quiudiuuñ, ja'a Moisés jecy quiujáhyyäbä. Pero højtshájtäm, cab hajxy jaduhñ ngudiúunäm. Paady jaduhñ yhahixø'øy coo hajxy ngumädóowämät. Coo ja'a Jesucristo hajxy xñähho'túutäm, quiumädoow je'e ja'a højtscøxphájtäm jaduhñ. Paadiä jecymiädia'agy hajxy xquia'a hanéhmänä, ja'a Moisés jecy quiujáhyyäbä. Ja'a Dioshespíritu hajxy xpiuhbéjtänä coo ja'a Dios hajxy xmiøødhíjtämät tu'ugjoot tu'ugwiinmahñdy. Jaduhñ hajxy xpiuhbéjtämbä coo hajxy haxøøg nga'a jäya'ayhájtänät.

⁵ Y coo ja'a Dioshespíritu hajxy jaduhñ xpiuhbéjtäm, paady hajxy nxiictaac nmädiaactáacäm nebiä Diosmädia'agy hajxy

maas hoy nyajtúunämät. Pero ja'a jäya'ay ja'a Dioshespíritu ja'a miädia'agy hajxy ca'a cudiunáanäbä, jaduñ hajxy xyiicta'agy miädiaacta'agy nebiä yhamdsoo wiinmahñdy hajxy yajtuñ.

⁶ Põñ jaduñ xiictaacp mädiaactaacp nebiä Dioshespíritu ja'a miädia'agy maas hoy miäbõjcät, je'e ja'a Dios jaduñ miøðhijpy tu'ugjoot tu'ugwiinmahñdy. Je'eduhñ nõcxaamb Dioswiinduum. Jootcujc je'e jim yhida'añ møødä Dios. Pero põnä yhamdsoo wiinmahñdy wi'i yajtunaamb, ja'a Dios ja'a miädsip je'eduhñ. Haxøøgtuum je'eduhñ ñä'ägä häda'aga'añ,

⁷⁻⁸ je'eguiøxpä coo ja'a Dios miädsiphaty. Cabä Diosmädia'agy hoy yajtuna'añ, ni ja'a jioot jaduñ quia'a tsocy coo yajtúnät. Y cab jaduñ quiumayii ja'a Diósäm.

⁹ Põnä Dioshespíritu ca'a møødhijp tu'ugmädia'agy, cabä Diosmädia'agy miäbøcy ja'a Jesucristocøxpä. Coo mijts jaduñ mjaançh mäbøcy, paady mijtsä Dioshespíritu mmøødhity tu'ugmädia'agy. Y coo ja'a Dioshespíritu hajxy jaduñ mmøødhity, paadiä mhaxøøgwiinmahñdy hajxy tøø mhøxhijxnä.

¹⁰ Tøyhajt jaduñ coo hajxy nho'ogáanäm, je'eguiøxpä coo ja'a Adán jecy quiädiehy, ja'a hajxy jecy nhaphájtäm ndeedyhájtäm. Pero coo mijtsä Dios tøø xpiäda'agy hawa'adstuum, y coo ja'a Jesucristo hajxy mmøødhity tu'ugmädia'agy, paady mijtsä Dioshespíritu xyagjugyhada'añ homiänaajä nebiä Dios jiugyhatiän. Jim hajxy xyajnøcxa'añ Dioswiinduum.

11 Coo ja'a Dioshespíritu hajxy xmiøødhíjtäm tu'ugmädia'agy, paadiä Dios hajxy xyagjujypiøjtägatsáanäm ja'a yhEspírituhaam coo hajxy hánajty tøø nhó'cäm. Jaduhñ hajxy xyagjujypiøjtägatsáanäm nebiä Jesucristo yagjujypiøjtägajtsän.

12 Mägu'ughajpädøjc, jaduhñds je'e, hahixøøby jaduhñ coo ja'a Dioshespíritu miädia'agy hajxy nyajtúunämät. Cab jaduhñ yahixø'øy coo ja'a nhamdsoo wiinmahñdy hajxy nyajtúunänät tehñgahnä.

13 Hix, coo hajxy tehñgahnä haxøøg njatcøøyyänät, cabä Dios hajxy hoy nmøødhíjtämät tu'ugjoot tu'ugwiinmahñdy. Mänit hajxy jii by nhädáacämät haxøøgtuum. Pero coo ja'a nhaxøøgwiinmahñdy hajxy nnajtshixøøyyämät ja'a Dioshespírituhaam, jaduhñä Dios hajxy hoy nmøødhíjtänät tu'ugjoot tu'ugwiinmahñdy.

14 Hix, pønjaty jaduhñ puhbéjtäp ja'a Dioshespíritu nebiä Diosmädia'agy hajxy jaduhñ hoy yajtúnät, Dios yhuung hajxy je'e.

15 Haa ca'a, ja'a yhEspírituhaamä Dios hajxy xyhuunghájtäm, paady hajxy nnämäáyyäm: "Dios-teedy." Y coo ja'a Dios hajxy xyhuunghájtäm, paadiä Dios hajxy nga'a tsähgøøyyänä neby hajxy hijty ndsähgøøyyäm coo hajxy hijty xquia'a pädáacämnä hawa'adstuum.

16 Y coo ja'a Dioshespíritu hajxy jaduhñ xmiøødhíjtäm, jaduhñä tøyhajt hajxy xmióøyyäm coo ja'a Dios hajxy xyhuunghájtänä.

17 Coo ja'a Dios hajxy xyhuunghájtäm näguipxy møødä Jesucristo, paadiä Jesucristo hajxy jim

xyajñøcxáañäm Dioswiinduum. Paadiä Dios hajxy madiu'u xquiunuu'xáañäm näguipxy møødá Jesucristo, nebiä Dios jecy miänaañän cooc hajxy xquiunuu'xáañäm. Y coo hajxy ndsaačhpøjcämät ja'a Dioscøxpä nebiä Jesucristo chaachpøjqüian, mäniä Dios hajxy møj jaančh xpiädáacämät näguipxy møødá Jesucristo.

¹⁸ Høøčh jaduhñ mänaamb coo hajxy yaa weeñtiä ndsaačhpøjcäm hädaa yaabä naaxwiin. Pero cab jaduhñ ñä'ägädä mäbaady ni weeñtiä nebiä Dios ja'a hoyhajtä weenhajt hajxy jim xmio'owáañäm maa je'e wyiinduumän.

¹⁹ Tijatiä Dios yaa tøø quiunuu'xy hädaa yaabä naaxwiin, jia wl'i jiøbhixyp hajxy jaduhñ coo yhabáadät coo ja'a Dios ja'a hoyhajtä weenhajt mio'owa'añ pønjaty jaduhñ yhuunghajpy. Mäniä Dios jaduhñ miäna'ana'añ coo hajxy nga'a tsaačhpøgáañänä.

²⁰⁻²¹ Coo ja'a Adán jaduhñ jecy jawyiinhajt quiädiehčhohñ, ja'a hajxy jecy nhaphajt ndeedyhajtämbä, paadiä Dios ja'a tsø'ty ja'a häyohn yaa quiejxy hädaa yaabä naaxwiin. Mäduhñtiä Dios yaa tøø quiunuu'xy cøxiä hädaa yaabä naaxwiin, cøxaamb jaduhñ quiuhdägoyya'añ. Pero cabä pojpä hajxy tii miøødá. Ca'a jie'eguiøxpä ja'a Dios ja'a tsø'ty ja'a häyohn yaa quiejxy. Hix, jagooyyä jäya'ay pojpä cädieey hajxy miøødá, paadiä Dios tsø'ty häyohn yaa quiejxy. Jéquiänä Dios jaduhñ wyiinmaayy coo cøxiä wiinä chaachpøgät näguipxy møødá jäya'ayhajxy, tijatiä Dios yaa tøø quiunuu'xy, høxtä coonä yhabáadät coo ja'a Dios hajxy xquia'a yajtsaačhtiunáañänä. Mäniä Dios ja'a hoyhajtä

weenhajt hajxy nägøxiä xmio'owáanäm, højts Dioshuung, näguipxy møød tijaty ja'a Dios yaa tøø quiunuu'xy.

²² Hix, tijatiä Dios yaa tøø quiunuu'xy hädaa yaabä naaxwiin, jia wi'i jiøbhijxyp hajxy jaduñ coo yhabáadät coo ja'a Dioshuung ja'a hoyhajtä weenhajt hajxy mio'owa'añii. Tøyhajt jaduñ. Pero cahnä yhabaady, jaanč tehñ chaachpøjp hajxy jaduñ.

²³ Jaanä jaduñ højtshájtämbä, jaduñ højts ndsaačhpøjcämbä, jaduñ højts nja wi'i jiøbhíxämbä coo yhabáadät coo ja'a Dios hajxy pedyii xmio'owáanäm ja'a hoyhajtä weenhajt. Coos Dios hajxy xyhuunghájtäm, paady hajxy jaduñ xmio'owáanäm. Mänitä Dios ja'a hawiinjemybiä ni'xcopc xmio'owáanäm, ja'a mänaa ca'a ma'p ca'a tägoobiä. Coos ja'a Dios ja'a yhEspíritu hajxy tøø xyajnäguéjxäm, jaduñä tøyhajt hajxy nmøødhájtäm coo ja'a Dios hajxy xjiaanč huunghájtäm. Jaanä jaduñä tøyhajt hajxy nmøødhájtämbä coo ja'a Dios ja'a hoyhajtä weenhajt hajxy pedyii xmio'owáanäm.

²⁴ Coos ja'a Diosmädia'agy hajxy tøø nmäbøjcäm ja'a Jesucristocøxpä, paady hajxy nnähwaats nguhwáatsäm, paadiä Dios hajxy xmiøødhíjtänä tu'ugjoot tu'ugwiinmahñdy. Y paady hajxy nja wi'i jiøbhíxäm coo yhabáadät coo ja'a Dios hajxy xmio'owáanäm ja'a hoyhajtä weenhajt cøxiä. Cahnä yhabaady, paady hajxy nja wi'i jiøbhíxämnä. Coos häxøpy tøø yhabaatnä, cab hajxy häxøpy njøbhíxänä.

²⁵ Coos hajxy hamuumdu'joot nmäbøjcäm coo

ja'a Dios hajxy tøyhajt xmio'owáanäm tijaty hajxy xyajmädsójcäm, paady hajxy tsøc mee'xtújcäm mäduhñtiä hajxy yaa njaac jøbhíxäm, hoy hajxy nej nja jajt nja habéjtäm.

26 Y xpiuhbéjtämä Dioshespíritu hajxy nebiaty hajxy hamdsoo nga'a jadáanäm. Hiḡ, coo ja'a Dios hajxy naxy nja wi'i pia'ya'axáanäm, cab hajxy naxy nnajuøøyyäm tijatiä Dios hajxy nmäyujwáanämb, waambatiä Dios hajxy nmänuu'xtáacämät. Naxy hajxy jaduhñ njájtäm coo ja'a capxy ja'a mädia'agy hajxy hoy xquia'a habädsømäanäm. Nä'ä møcxéjjäm nä'ä ho'ogyxiéjjäm hajxy jaduhñ. Pero coo hajxy nga'a najuøøyyämät nebiä Dios hajxy nmänuu'xtáacämät, mänitä Dioshespíritu hajxy xpiuhbéjtämät.

27 Piuhbejpiä Dioshespíritu pønjatiä Diosmädia'agy tøø miäbøcy. Hoorä, ñajuøøbiä Dioshespíritu jaduhñ waambatiä Dios jioot chocy coo ja'a Dios hajxy nmänuu'xtáacämät. Jaduhñä Dioshespíritu hajxy xyajxiic xyajmädiáacäm ja'a ngopcootyhájtäm. Y ñajuøøbiä Dios jaduhñ waambaty hajxy nxiic nmädiáacäm ja'a ngopcootyhájtäm.

28 Hoorä, cab hajxy njootmayhájtämät coo Dios ja'a tsaachpä peenä hajxy xmióoyyämät. Haa ca'a, nnajuøøyyäm hajxy jaduhñ coo Dios quiøxy najuøøy nebiaty hajxy njajt nhabéjtäm, pønjatiä Dios tsojp. Nnajuøøyyäm hajxy jaduhñ coo Dios wyiinmay coo hajxy ween xyhoyøøyyäm cøxiä wiinä. Tøø hajxy xyajnähdíjjäm coo hajxy njäya'ayhájtämät nebiä jioot choquiän.

Jaanä jaduñ hajxy xyhawáañämbä cooc hajxy xyhuunghadáañäm.

²⁹ Hix, jéquiänä Dios yhuuc najuøøbiä pønjataä miädia'agy hñajty mäbøgåañäxäp. Je'ehajxy jaduñ yajnähdiñä coo hajxy yhojiäya'ayhadät nebiä Jesucristo yhojiäya'ayhatiän, ja'a Dios yHuung. Jaduñä Dios hajxy nägøxiä xyhixáañänä nebiä Jesucristo yhuchän. Højts jaduñ xñänøømäm coo Jesucristo hajxy nbuhya'ayhadáañäm, je'eguiøxpä coo Dios hajxy xyhuunghájtäm.

³⁰ Coo Dios hajxy jecy xyajnähdiñäm coo miädia'agy hajxy nmäbøjcämät, paady hajxy tøø xyhawáañäm cooc hajxy xyhuunghadáañäm. Y coo miädia'agy hajxy jaduñ tøø njaançh mäbøjcäm, mänit hajxy xpiädáacäm hawa'adstuum. Jaduñ tøø miänaambä coogä cuhdujt hajxy nmøødhadáañäm nebiä Jesucristo miøødän.

³¹ Homiädoonä hädaa mädia'agy, túhmäts. Coo Dios hajxy jecy xyajnähdiñäm coo hajxy xyhuunghájtäm, ni pøn jaduñ xquia'a yajtu'udägøoyyämät. Tøyhajt jaduñ coo Dios yajtøjiada'añ tijaty tøø wyiinmay ja'a højtscøxphájtäm.

³² Xjiaançh tehñ chøjcämä Dios jaduñ. Høxtä ñähdujc ja'a yhamdsoo Uung coo hajxy hoy xñähho'túutäm nägøxiä. Jaançh tehñ miøjja Dios mayhajt jaduñ tiuñ ja'a højtscøxphájtäm. Jaduñä tøyhajt hajxy nmøødhájtäm coo ja'a mayhajt jaduñ tehngajnä jiaac tuna'añ.

³³ Coo Dios hajxy tøø xyajnähdiñäm coo miädia'agy hajxy nmäbøjcämät, paady hajxy

pøn hoy xquia'a näxø'øwø'øwáanäm maa Dioswiinduumän. Haa ca'a, tøø Dios hajxy xpiädáacäm hawa'adstuum.

³⁴ Ni pøn hajxy jaduñ hoy xquia'a päda'agáanäm haxøøgtuum. Haa ca'a, jimä Jesucristo hajxy xñähgapxtúutäm Dioswiinduum. Ja'a Dios yhahooyhaambiä Jesucristo yhäña'ay. Møj jaančh jim yhity. Paady hajxy jim xñähgapxtúutäm, coo hajxy hoy tøø xñähho'túutäm, møød coo hoy tøø jiuypiojtägach. Jaduñ hajxy tøø xyajnähwaats tøø xyajcuhwáatsäm.

³⁵ Xjiaančh tehñ chójcämä Jesucristo hajxy jaduñ nägø'ø nädecypä. Nnä'ägädä møødhájtämä tøyhajt hajxy jaduñ coo hajxy mänaa xquia'a nähgue'egáanäm, hoyyá tsaachpä peenä hajxy cu nja páatäm, hoy hajxy pøn cu xjia tsaachtíuunäm ja'a Diosmädia'agyquiøxpä, hoyyá yuu hajxy cu xjia páatäm, hoyyá wit tucxy hajxy cu nja yajmaajíjtäm, hoy hajxy mäjahñdiuum cu nja wädíjtäm, hoyyá cahwiindøyhána'c hajxy cu xjia yaghó'cäm.

³⁶ Jaduñ jim myiñ cujaay maa Diosmädia'aguiän:

Xøømdsuhñ højtsä cahwiindøyhána'c
xjia wi'i yagho'oga'añ ja'a miich
mmädia'agyquiøxpä;

ho'cøøc højts xñä'ägädä wa'ana'añ,
nømä Dios ñämaayyá.

³⁷ Hoy hajxy jaduñ cu nja jajt, hoy hajxy jaduñ cu nja habéjtäm, nnä'ägädä mee'xtugáanäm hajxy jaduñ. Ja'a Jesucristo hajxy jaduñ xñä'ägädä puhbéjtäm, je'eguiøxpä coo hajxy xjiaančh tehñ chójcäm. Naamgahnä

hajxy tii xjiájtäm xyhabéjtäm, jaduñnä Jesucristo hajxy maas hoy nbanócxämät hamuumdu'joot.

38-39 Coó Dios hajxy xjiaanč tehṁ chójcäm, jaduñnä tøyhajt hajxy njaanč tehṁ miøødhájtäm coo Jesucristo hajxy tehṁgajnä xñä'ägädä puhbedáanäm, hoy ñeipiä hajxy cu nja jajt cu nja habéjtäm, hoy yhädaa yaabä naaxwiinä, hoy hajxy cu nja hó'cäm, hoy hajxy cu nja tågóoyyäm, hoy hajxy cu nja jaac jugyhájtäm, hoy hajxy cu nja jaac tsuxc-hájtäm, hoyyä møjcuħdujtmøødpäðjc hajxy cu xjia mädsiphájtäm, ja'a pojhajpä täxa'ahajpä, hoyyä møjcu'ugong hajxy cu xjia mädsiphájtäm, hoy miaajä hajxy jia hity, hoy yhädaa yaabä naaxwiinä, hoy jyim tsajpootypä, hoy jyiiby møjcu'uhaamä. Pero cabä cuħdujt hajxy ñä'ägädä møødä maa Jesucristocøxpän, ja'a hajxy nWiindsønhájtämbä. Paadiä Jesucristo hajxy homiänaajä xchójcäm; paady hajxy homiänaajä xcwieendähájtäm.

9

1-3 Jaanč tehṁ jiootmayhájpøčhä judíoscøxpähajxy je'eguiøxpä coo hajxy quia'a mäbøga'añ coo ja'a Jesucristo hajxy tøø ñähho'tu'udyii. Høøch nmägunaaxhajxy je'e. Jaanč tehṁ chaačhøøbiøch njoot jaduñ coo hajxy quia'a mäbøga'añ. Tøyhøch jaduñ nmädia'agy. Coočhä Jesucristo nmøødhity tu'ugjoot tu'ugwiinmahñdy, jaduñnä tøyhajt hajxy mmøødhädät cooçh nga'a høhñda'agy. Ja'a nhamdsoo juøhñdyháamhøch jaduñ nnajuø'øy cooçh nga'a høhñda'agy, møød coo Dioshespíritu jaduñ miänaambä. Jaanč tehṁ chaačhøøbiøch

njoot jaduñ cooĉhä nmägunaaxhajxy quia'a mabøga'añ; høxtä cu nja nähhädaactu'udáañhöch hajxy jiiiby haxøøgtuum coo Dios jaduñ cu miänaañ. Jadúñhöch nmäna'ana'añ cooĉhä Jesucristo cu xquia'a yajnäwhaach, pero cooĉhä nmägunaaxhajxy cu yajnäwhaatsä. Hoorä, ja'a Israel, højts nhap ndeedy hijty je'e jegyhajty.

⁴ Jéquiänä Dios ja'a Israel miøødyajcuhdujcy coo Israel yhap yhoc-hajxy hänäjty piuhbedáañäxä. Jaanĉ huunghajtä hajxy je'eduhñ ja'a Diósäm. Je'eduhñ ñänøømby coo hajxy jaduñ quiu'ughajtä ja'a Diósäm. Yhijx hajxy jaduñ coo Dios ja'a miäjaa yajcähxø'cy jim mädøyyä maa Diostøjcän. Jaduñ hänäjty quiähxø'øgy nebiä jocän. Mänitä Dios hajxy yhanehmä madiu'u. Mänitä Moisés quiujahy nebiatiä Dios hänäjty tøø yhane'emiän. Mänitä Dios cuhdujt yejcy nebiatiä Dios hajxy jaduñ jim wyiingudsähgø'øwät. Mänitä Dios tøyhajt yejcy coo ja'a yajnäwhaatspä hajxy hänäjty yajnäguexa'añii. Cooĉ jaduñ nnänømy coo hajxy yhaphaty yhoc-hadyii ja'a Israel, højts jaduñ niñänøømäp, højts judíosahajxy.

⁵ Højtsä jecyjiäya'ay nhaphajt ndeedyhajt, ja'a Abraham møødä Isaac møødä Jacobo. Cumaayyä ja'a jecyjiäya'ayhajxy jaduñ ja'a Diósäm. Y coo Cristo yaa hoy jiäya'ayhaty hädaa yaabä naaxwiin neby højtshájtäm, jaanä jaduñ je'e yhaphájtäbä yhoc-hájtäbä ja'a Israel. Dioshajpä Cristo. Cøxiä wiinä je'eduhñ yhane'emy homiaajä. Tsøc haxxy wiingudsähgøøyyäm homiänaaxøøjä coo miøjjä coo jiaanĉhä. Tøyhajt jaduñ.

⁶ Cooĉ nmäna'añ cooĉhä nmägunaaxhajxy quia'a mabøga'añ coo Jesucristo hajxy tøø

xñähho'túutäm, cáboch jaduñ nmäna'ana'añ cooc tyijy ja'a Dios ja'a miädia'agy tøø quia'a yajtøjiaty coo jecy miänaañ coogä Israel yhap yhoc-hajxy hänajty yajnähwa'adsa'añii. Hix, coo Dios ja'a Israel jecy ñämaayy coo yhap yhoc-hajxy hänajty yajnähwa'ads yajcuhwa'adsáañäxä, cabä Dios hänajty miäna'ana'añ cooc tyijy hajxy hänajty nägøxiä ñähwa'ads quiuhwa'adsa'añ. Jue'e hänajty ñänøømby pønjaty mábøjp coo Dios yajtøjiaty waambaty tøø quiapxy tøø miädia'agy. Hix, cabä Israel yhap yhoc-hajxy nämay miäböcy coo hajxy tøø ñähho'tu'udyii ja'a Jesucristäm. Pønjaty jaduñ mábøjp, je'eds hajxy jaduñ tøyhajt haphájtäp hoc-hájtäp ja'a Israel. Pønjaty jaduñ ca'a mábøjp, cab hajxy tøyhajt yhaphaty yhoc-hadyii ja'a Israéläm.

⁷ Jaanä jaduñä Abraham ja'a yhuunghajxy je'ebä. Tu'uquiä jaduñ ñänøømä ja'a Diósäm coo hoyhajt weenhajt hänajty mio'owáañäbä nebiä Abraham hänajty mio'owa'añiiján. Ja'a Abraham ja'a yhuung tu'ugpä, cab je'e jaduñ ñänøømä coo tii mio'owa'añii. Jaduñ jim myiñ cujaay maa Diosmädia'aguiän: “Ja'a miich mhuung Isaac, je'e yhap yhoc-høch jaduñ nhixáañäp nej miich mhap nej miich mhocän”, nømä Dios ja'a Abraham jecy ñämaayy.

⁸ Jaduñä tøyhajt hajxy nmøødhájtäm coo Isaac yhap yhoc-hajxy quiu'ughájtäxä ja'a Diósäm. Paadiä Isaac yhap yhoc-hajxy jaduñ quiu'ughájtäxä ja'a Diósäm coo Abraham jecy yhawaañä coo tio'oxiøjc hänajty yhuungpaada'añ. Cooc ja'a Abraham jaduñ yhawáañäxä, tøø ja'a Sara hänajty miäjay, y cabä yhuung hänajty ni

tu'ugtä.

⁹ Hix, cahnä Sara hānajty yhuungpaadyñä, tóoyyämä Dios ja'a Abraham hānajty jaduhñ ñāma'ay: “Coo jaduhñ yhabáadät, mänit miich mhixa'añ coochä nmädia'agy nyajtøjiada'añ. Co'na'awaambä mdo'oxiøjc Sara. Ya'ayhāna'c jaduhñ minaamb ca'awaamb”, nømä Dios ja'a Abraham jecy ñāmáguiumbä. Ja'a Isaac jaduhñ nānøømä coo hānajty myina'añ quia'awa'añ.

¹⁰ Jaanä jaduhñä Rebécabä, ja'a Isaac tio'oxiøjc, coo je'e quio'naabiä, mänitä pigāna'c-hajxy myiñguiahya tähoochemcpä.

¹¹⁻¹² Cahnä Rebeca hānajty quio'na'ayñä, tóoyyām hānajty ñāma'ayii ja'a Diósām coo ja'a Jacobo ja'a Esaú hānajty yhane'ema'añ, hoyyā Esaú jayøjp jia mejch, hoyyā Jacobo jia jaac tehñ miejch høxhaam. Paadiä Dios jaduhñ miānaañ, tóoyyām hānajty wyiinmahñdyhaty coo Jacobo yhap yhoc-hajxy hānajty quiu'ughadāañäxä ja'a Diósām, møød coo Esaú yhap yhoc-hajxy hānajty jaduhñ quia'a cu'ughadāañäxä, hoy hānajty quia'a jagä cāhxø'øgyñä pø hoyhāna'c-hadaambä Rebeca yhuunghajxy hānajty, pø caj. Hix, hamdsoojootä Dios jaduhñ wyiinmahñdyhajty nebiä Jacobo hānajty yhixa'añ, nebiä Esaú hānajty yhixa'añ.

¹³ Jaduhñ jim myiimbä cujaay maa Diosmädia'aguiän: “Ndsójc-høchä Jacobo møødä yhap møødä yhoc-hajxy, páadyhøch hajxy nnäxuudsa'añ. Pero ja'a Jacobo yhajch, ja'a Esaú, cábøch je'e nnäxuudsa'añ. Ni cábøchä yhap yhoc-hajxy jaduhñ nnäxuudsáañäbä”, nømä Dios cujecy miānaañ.

14 Pero cab hajxy hawiinmats waamb nmänáañämät cooc tyijy Dios hoy quia'a wiinmahñdyhajty coo miänaañ coogä Jacobo yhap yhoc-hajxy hñajty piuhbedáañäxä, møød coogä Esau yhap yhoc-hajxy hñajty quia'a puhbedáañäxä. Caj pues. Haa ca'a, hoyyã Dios jaduñ wyiinmahñdyhaty homiänaaxøøjã.

15 Hix, jaduñã Dios ja'a Moisés jecy ñãmaayy: “Nnäxúu'chpøch nba'häyóobiøch pøñjátyhøch njoot chojpy cooçh jaduñ nnäxúudsät, cooçh jaduñ nba'häyówät. Cábøch nnäxuudsãañ pøñhøch njoot quia'a tsojpy cooçh nnäxúudsät.”

16 Coos Dios jaduñ miänäxuuçh, jaduñ hajxy nyajnajuøoyyãm coo hojioot jiaanch tehñ miøødã. Hamdsoo ñägapxy pøñ ñäxuudsãamby. Hamdsoojoot jaduñ miänäxuuçh, caj jie'eguiøxpã coo hajxy cu nja nämáayyãm coo hajxy ween xñäxúu'tsãm, coo hajxy ween xpia'häyóowãm. Ni quia'a je'eguiøxpã coo njoot hajxy nbädáacãm coo hajxy hoy njäya'ayhãjtãmät.

17-18 Hix, ñäxuu'chpã Dios pøñ ñäxuudsãamby. Jaanã jaduñduhmbã, yajnãhdijpiã Dios coo quiopc-hajxy xiéxät pøñã Dios jaduñ yajmãdsojpy coo quiopc-hajxy jaduñ xiéxät. Jaduñã Dios ja'a gobiernã ja'a quiopc jecy yajxejã, ja'a hñajty jim hanehmbã Egiptonaaxooty. Tøyhajt jaduñ. Haa ca'a, jaduñ jim myiñ cijaay maa Diosmãdia'aguiãn coo Dios ja'a gobiernã jaduñ ñãmaayy: “Páadyhøch miich tøø nyajmøjtägø'øy, tøøch hñajty nwiinmay cooçhã nmãjaa hñajty nyajcãhxø'øga'añ maa mijts mnaax maa mijts mgajptãn. Cooçh ngu'ug jim nhøxwoobãdsømjät

maa mijts mnaax maa mijts mgajptän, jaduhñhöch nmäjaa njaanč tehñ yajcähxø'øga'añ. Jaduhñä mädia'agy wiädita'añ wiinduhmyhagajpt ja'a høøchcøxpä cooçh njaanč tehñ miøjjä cooçh njaanč tehñ jiaančhä”, nømä gobiernä jecy ñämaayyä.

¹⁹ Jii häna'c-hajxiäda'a näje'e miäna'ana'añ: “Cabä Dios wyiinmahñdy yhooyä je'eguiøxpä coo hajxy xñäxø'øwøøyyäm cooc højts pojpä cädieey nmøødhájtäm. Haa ca'a, hamdsoo højts ngopc tøø xyajxéjxäm. Paady højts pojpä cädieey nmøødhájtäm.”

²⁰ Pero cab jaduhñ yhahixø'øy coo pøñ jaduhñ miänä'anät. Tøyhajt jaduhñ. Caj pues. Haa ca'a, yaa hajxy njäya'ayhájtäm. Cabä cuhdujt hajxy nnä'ägädä møødhájtäm ni weeñtiä coo Dios hajxy nhadsóowämät. Hix, jaduhñ mäwínäts højts Dios xyajnähdíjjäm nebiä tu'tspojtspädøjc-hajxy piochän nebiä jioot hajxy yajmädsøquiän. Coo tu'ts quiapxø'øgät, cabä pojtspä hawiinmats ñämá'awät: “Tiich yajxón coo xquia'a pojch.” Caj pues, cab jaduhñ yhahixø'øy coo tu'ts jaduhñ miänä'anät.

²¹ Haa ca'a, miøødä tu'tspojtspädøjc cuhdujt hajxy jaduhñ coo tu'tsnaax hajxy yajtúnät nebiä jioot hajxy yajmädsøquiän. Pø chojpiä jioothajxy jaduhñ coo tsowdu'ts hajxy piódsät, pues miøødä cuhdujt hajxy jaduhñ coo hajxy jaduhñ piódsät. Y pø chojpiä jioothajxy jaduhñ coo cuhga'aybä hajxy piódsät, jaduhñä cuhdujt hajxy miøødäbä coo hajxy jaduhñ piódsät. Jaduhñ mäwínädsä Dios cuhdujt miøødäbä coo hajxy xyajnähdíjjämät nebiä jioot choquiän. Coo jioot jaduhñ chógät coo

hajxy xpiädáacämät hawa'adstuum, pues miøødä cuhdujt jaduñ coo hajxy jim xpiädáacämät. Y coo jioot jaduñ chógät coo hajxy xpiädáacämät haxøøgtuum, jaduñä cuhdujt miøødäbä coo hajxy jaduñ jim xpiädáacämät.

²² Y jaanä jaduñä Dios cuhdujt miøødäbä coo jaduñ miee'xtujcy ja'a cahwiindøjiäya'aguiøxpä. Miøødä Dios cuhdujt jaduñ coo ja'a cahwiindøjiäya'ayhajxy yajcumädowøøjät. Pero cab hajxy choj cumädowa'añ, hoy hajxy tøø jia cädieey hanaxiä. Hawiinmats hit jaduñ coo hajxy paquiä quiumädówät. Y coo Dios hänäjty yajcumädowa'añ ja'a quiädieeguiøxpähajxy, hijxtahñdä Dios jaduñ yajcähxø'øgaamby coo mäjaa møc miøødä. Jaduñ yajcähxø'øgaambä coo haxøøghäna'c-hajxy tehngajnä quia'a mee'xtuga'añii.

²³⁻²⁴ Coo Dios jaduñ jecy wyiinmahñdyhajty coo haxøøghäna'c yajcumädowa'añ, paady jaduñ wyiinmahñdyhajty neby højts jaduñ hoy nwiinjuøøyyämät coo jaduñ yhawiinmatsä coo haxøøghäna'cä quiädieey hajxy quiumädówät. Jaanä jaduñduhmbä, paadiä Dios jäya'ay näje'e quia'a yajcumädoy, je'eguiøxpä coo hajxy ñäxuuchii ja'a Diósäm, hoy hajxy hänäjty tøø jia cädieey. Jequiän hajxy jaduñ yajnähdiñjä coo hajxy jim ñøcxät Dioswiinduum. Højts jaduñ xñänøømäm coo Dios hajxy tøø xyajnähdiñjäm coo hajxy jim xyajnøcxáañäm wyiinduum, pønjaty hajxy tøø xyajwiinwaanøøyyäm coo hajxy xyhuunghadáañäm, møødä judíoshajxy, møødä cajpä judíoshajxy. Jaduñ hajxy nwiinjuøøyyäm coo Dios møjmayhajt tøø tiuñ maa højtscøxphájtäm,

møød coo hojioot jiaančh tehñ miøødä.

²⁵ Maa Oseas nocy jecy quiujahyyän, jaduññ jim myiññ cijaay coo Dios jaduññ miänaaññ:

Yø'ø jäya'ayhajxy cajpä judíos, cábøch hijty ngu'ughaty.

Cábøch hijty ndsocy. Pero tøøch nyajñähdiñä cooçh ngu'ughadaaññä. Ndsóññäbøch jaduññ.

²⁶ Wiingtuum miänáangumbä: “Cábøch mijts hijty ngu'ughaty.”

Pero jaduññhájtøch mijts nhuunghadaaññä, homiaajä hajxy mhity,

nøñä Dios miänaaññ. Homiänaajä Dios yhity.

²⁷ Y ja'a Isaías, jaduññ je'e jecy quiujahy: “Yø'ø judíoshajxy, hoy hajxy jaduññ jia nämayyä nebiä tsäbiu'ujän, näweeññtiä hajxy jaduññ cho'oga'añ.

²⁸ Ja'a jäya'ayhajxy yaa cádiehbiä hädaa yaabä naaxwiin, mobädajpä hajxy yajcumädowa'añii ja'a Diósäm. Tähooc-yajcumädoybä hajxy yajcumädowa'añii hoyhoy.”

²⁹ Jaanä jaduññä Isaías jecy miädiáaccumbä ja'a judíoscøxpähajxy:

Cøxiä wiinä Dios yhane'emy homiaajä. Coø højtsä Dios häxøpy tøø xquia'a näxúu'tsäm,

tøø højts häxøpy ngøxy cuhdägóoyyäm, nebiä jäya'ayhajxy jecy quiuhdägooyyän,

ja'a hajxy hijty jegyhajty tsänaabiä maa cajpt hijty xiøhatiän Sodoma møød Gomorra.

³⁰ Nébiøch chamñ tøø ngujaayän, jequiän højtsä Dios xyajñähdiñy coo højts hänajty xquiui'ughada'añ, højts judíoshajpä. Pero, ja'a jäya'ayhajxy cajpä judíos, cabä Dios hijty je'e ñäxuuçh. Ni ja'a jäya'ayhajxy hijty quia'a

näxúu'tsäbä, ja'a hajxy hänäjty ca'a tajp ca'a maabiä maa ñähwaatstaact hajxy piáadät. Pero cahnä jiegøøy coo mädia'agy hajxy tøø miädoonä coogä Dios ja'a Jesucristo yaa quiejxy, cooc ja'a Jesucristo hajxy hoy xñähho'túutäm. Cooc hajxy jaduhñ miädooy, näje'e hajxy miäbøjcy; paady hajxy tøø ñähwa'açh, paady hajxy tøø quiuhwa'açh.

³¹⁻³² Pero yøø judíoshajxy, jaduhñäc tyijy hajxy hijty ñähwa'adsa'añ je'eguiøxpä cooc tyijy hajxy hoy quiudiuñ nebiä Moisés jecy quiujahyyän. Pero cab hajxy jaduhñ ñä'ä nähwaach je'eguiøxpä coo tøyhajt hajxy quia'a møødä coo Dios miäyajnähwa'açh je'eguiøxpä coo hojioot miøødä, ca'a jie'eguiøxpä coo jäya'ayhajxy hoy jia wi'i jäya'ayhada'añ. Paadiä judíoshajxy quia'a nähwaach je'eguiøxpä coo hajxy quia'a mäbøjcy coo højtsä Jesucristo xñähho'túutäm. Jaduhñ mäwiin hajxy jiaty nebiä häna'c quiuhnepiän tsaanähgøxp päyø'cujc. Cab hajxy ñä'ägä mech maa hajxy hänäjty jia wi'i ñøcxa'añän.

³³ Tøøyyämä Dios hänäjty ñajuøøy coo judíoshajxy hänäjty quia'a mäbøga'añ coo Dios ja'a Jesucristo yaa quiejxy hädaa yaabä naaxwiin. Jimä cajpt tu'ug xiøhaty Siön. Jimä judíoshajxy chäna'ay, ja'a Dios quiu'ughajpiä. Jaduhñ jim myiñ cujaay maa Diosmädia'aguiän:

Jímhøch ngu'ug chäna'ay maa cajpt jaduhñ xiøhatiän Siön.

Jímhøchä tsaa tu'ug nbäda'aga'añ, weenä jäya'ayhajxy jim quiuhnepy maa tsaajän, ween hajxy jim quiäday.

Ja'a Jesucristo jaduñ mābaat neby yø'ø tsaajän. Hix, pøn jaduñ ca'a mæbøjp coo højtsä Jesucristo hoy xñäho'túutäm, jaduñ je'e miäbaady nebiä häna'c cuhnejpän. Quiumädowaamby je'e. Pero pøn jaduñ jaančh mæbøjp ja'a Jesucristocøxpä, je'eds hodiium päda'agäänäp.

10

¹ Mägu'ughajpädøjc, jia tsójpjøch njoot jaduñ coo judíoshajxy ñähwá'adsät. Jadúhñhøchä Dios nja pa'ya'axy jaaya'aguiøxpä. Haa ca'a, judíohájpøch høøchpä.

² Jia wi'i quiudiunaambiä Diosmädia'agy hajxy. Tøyhajt jaduñ. Pero cabä Diosmädia'agy hajxy hoy wyiinjuø'øy.

³ Hamdsoo hajxy jia wi'i yajniñähwa'adsa'añii yhamdsoo cuhdujtcøxpä. Hix, cab hajxy jaduñ wyiinjuø'øy tiiguiøxpä Dios ja'a jäya'ay piäda'agy hawa'adstuum. Paady hajxy jim piäda'agyii coo Dios ja'a miädia'agy hajxy miäbøjcä coo hajxy jaduñ ñähwa'adsa'añii.

⁴ Pønjaty mæbøjp coo hajxy tøø ñähho'tu'udyii ja'a Jesucristäm, je'edsä Dios ñäxuu'chp. Coo Jesucristo hajxy cu xquia'a nähho'túutäm, ngumädowáañäm hajxy hijty, je'eguiøxpä coo jecymiädia'agy hajxy tøø nga'a cudiúunäm, ja'a Moisés jecy quiujáhyyäbä. Ja'a Jesucristo mæbøcpiä, ca'xiä jecymiädia'agy quiudiuñ, ja'a Moisés jecy quiujáhyyäbä, nebiä Dios hänajty tøø yhane'emiän. Jaančh tehñ yhooyä Jesucristo jaduñ yhäna'c-hajty. Cabä pojpä cädieey hänajty ñä'ägädä møødä ni weeñtiä. Paady hijty jaduñ quia'a hahixø'øy coo jaduñ cu yho'cy. Pero

coo ja'a Jesucristo hajxy hoy xñähho'túutäm, paady yø'ø jecymiädia'agy hajxy jaduhñ xquia'a hanéhmänä, ja'a Moisés jecy quiujahyyäbä.

⁵ Jaduhñä Moisés jecy quiujahy coo judíoshajxy pedyii quiudiúnät nebiaty hänäjty tøø quiujaay. Jaduhñägä hoyhajtä weenhajt hajxy piáadät.

⁶ Coo hajxy nmäbójcämät maa Jesucristocøxpän, jaduhñä hoyhajtä weenhajt hajxy nbáatämät. Ja'a Diosmädia'agy jaduhñ mänaamb. Pero cab hajxy ndaj nmáayyämät: “Pøñ jim nócäp tsajpootyp coo yajñähwaatspä wioomänácät.”

⁷ Ni jaduhñ hajxy nga'a taj nga'a máayyämät: “Pøñ jiiby hädá'agäp møjcu'uhaam coo ja'a yajñähwaatspä wioobédät, jiiby maa ho'ogyjiäya'ay yháañämähajxy yhitiän.” Paady hajxy jaduhñ nga'a taj nga'a máayyämät je'eguiøxpä coo Jesucristo yaa tøø yhooñä hädaa yaabä naaxwiin, coo hajxy hoy tøø xñähho'túutänä, møød coo jadähooc jiuypiojtägajch. Hix, jaduhñ hajxy tøø xyajñähwaats tøø xyajcuhwáatsäm.

⁸ Nägooyä hajxy jaduhñ nmäbójcämät coo Jesucristo hajxy tøø xñähho'túutäm, jaduhñ hajxy nnähwáatsämät. Cab hajxy jaduhñ pøñ xñámáayyämät coo nähwaatstaact hajxy wiingtuum nhøxtáayyämät. Cab hädaa mädia'agy jaduhñ ñä'ägä tsipä. Howyiinjuøøñä hädaa mädia'agy jaduhñ. Jaduhñ højts nnä'ägä yajñähixø'yhaty.

⁹ Coo hajxy mejtstu'u ngudiúunämät, mänit hajxy nnähwáatsämät. Je'eçh jaduhñ nnänøømby mejtstu'u, coo hajxy nnägápxämät cu'ughagujc coo Jesucristo hajxy nWiindsøn'hájtäm, møød coo hajxy nmäbójcämät hamuumdu'joot coo Dios ja'a

Jesucristo yagjuypiojtägajch mänaabä hänäjty tøø yho'oguiän. Coo Dios ja'a Jesucristo jaduñ yagjuypiojtägajch, jaduñ hajxy nnajuøøyyäm coo Dios ja'a Jesucristo quiumay, møød pønjaty ja'a Diosmädia'agy mæbøjp ja'a Jesucristocøxpä.

10 Coo hajxy jaduñ nnä'ägä mæbøjcämät hamuumdu'joot, jaduñä Dios hajxy xquiumáayyämät. Y coo Jesucristo hajxy nmädiácämät cu'ughagujc coo hajxy nWiindsønhájtäm, mänit hajxy nnähwáatsämät.

11 Jaduñä Diosmädia'agy miäna'añ: “Pøn jaduñ jaançh mæbøjp ja'a Jesucristocøxpä, je'eds jaduñ päda'agáañäp hodium ja'a Diósäm.”

12 Hix, tu'cuhtujt højtsä Jesucristo xyhíxäm, møødä judíoshajxy, møødä ca'a judíoshajxypä. Tu'cuhtujt højtsä Jesucristo jaduñ xyhu-unghájtäm. Coo højtsä Jesucristo nba'yáaxämät coo nbojpä ngädieey hajxy xyajnähwáatsämät, tsipcøxp højts jaduñ xñäxúu'tsämät, tsipcøxpä mayhajt jaduñ tiúnät maa højtsøxphájtäm.

13 Jaduñä Diosmädia'agy miänáangumbä: “Pønä Jesucristo pa'yaaxp, hodium je'eduhñ piäda'aga'añii ja'a Diósäm.”

14 Pønjaty ca'a mädoobnä ja'a Jesucristocøxpä, cabä Jesucristo hajxy jaduñ hoy miänuu'xta'aga'añ. Tøyhajt jaduñ. Pø cahnä hajxy jaduñ miädoyhaty coogä Jesucristo hajxy tøø xñähho'túutäm, cab hajxy hoy miäbøga'añ. Pø cahnä hajxy yajwiingapxø'øyii ja'a Jesucristocøxpä, cab hajxy hoy miädown'añ.

15 Ja'a Diósädsä cugapxy quejx coo ja'a miädia'agy yajwá'xäxät maa jäya'ayhajxiän,

ja'a cahnä hajxy hñajty miädoybä. Jaduhñ jim myiñ cujaay maa Diosmädia'aguiän: “Pønjetiä Diosmädia'agy tøø miädoy coogä Dios yajnähwa'ačh pønjetiä Dios pa'yaaxp, paady hajxy xioonda'agy coo hajxy jaduhñ tøø miädoonä. Jaanč tehñ yhoy jaduhñ coo Diosmädia'agy jaduhñ wia'xy.”

¹⁶ Pero cabä jäya'ayä Diosmädia'agy hajxy nägøxiä tøø miäböcy ja'a Jesucristocøxpä. Jaduhñä Isaiäs jecy quiujahy: “Dios, tøø miičh mmädia'agy nja yajwa'xä, pero cab pøn tøø miäböcy.”

¹⁷ Mayhagajptä Diosmädia'agy tøø wia'xy ja'a Jesucristocøxpä. Tøø jäya'ayhajxy may miädoonä. Näje'e hajxy hoy tøø wyiinjuø'öy. Je'eds hajxy jaduhñ tøø miäböcy. Coo hajxy quia'a mädoät, cab hajxy jaduhñ miäböät.

¹⁸ Hoorä, ja'a judíoshajxy, tøyhajt jaduhñ coo hajxy je'e miädóyyäbä. Haa ca'a, jaduhñ jim myiñ cujaay maa Diosmädiá'aguiänä: “Wiinduhmyhagajptä mädia'agy tøø wia'xy ja'a Dioscøxpä.”

¹⁹ Y jia wiinjuøöyy ja'a judíos ja'a mädia'agy hajxy jaduhñ ja'a Jesucristocøxpä. Pero cab hajxy miäböjcy. Ja'a jäya'ayhajxy ca'a judíospä, je'eds hajxy jaduhñ mäböjc. Jaduhñä Moisés jecy quiujahy coogä judíoshajxy ñämaayyä ja'a Diósäm:

Mbejxyp mijts pønjaty ca'a judíoshajpä cóogøch tyijy nga'a cu'ughaty.

Pero ngu'ughadáambiøch hajxy je'e. Jaduhñ mijts mnänømy cooc tyijy hajxy tii quia'a jaty quia'a najuø'öy.

Pero nnäxuudsáambiøch hajxy je'e, paady mijts mjootma'ada'añ,

nømä judíoshajxy jecy ñämaayyá.

²⁰ Mänitá Isaiás høxhaam jiaac cujahy coogä Dios miänaañ:

Pønjataiä nähwaatstaact hijty ca'a høxtaaby, tøøchä nmädia'agy hajxy xmiäbójcänä.

Cábøch hajxy hijty xyajtøy, pero tøøch hajxy nya-jwiinjuøøñä cooch hojioot njaanç tehñ miøødá.

²¹ Jadúhñägä Dios miänáangumbä: “Yø'ø judíoshajxy, tøøch hajxy jaduñ nja wi'i miänuu'xta'agy cooch nmädia'agy hajxy xmiäbójcät. Pero cab hajxy jaduñ ñä'ägä mäßøga'añ. Jaanç tehñ xiexä quiopcä tiaatsc-hajxy jaduñ”, nømä Dios jecy miänaañ.

11

¹ Pero cábøch nmäna'ana'añ coo judíoshajxy tøø ñajtshixø'øyyi ja'a Diósäm. Caj pues, caj tiähooçnajtshixø'øyyä; paquiä hajxy ñajtshixøøyyä. Haa ca'a, judíoshájpøch høøçhpä. Abrahámhøch nhaphajt ndeedyhajt. Y ja'a Benjamínhajpä, møød je'eçh nhaphajty ndeedyhajty. Ja'a Abraham yhap yhoc je'ebä, ja'a Benjamínhajpä.

² Cab højtsä Dios tøø xñajtshixø'øy, højts judíoshajpä. Hiç, jequiän højtsä Dios xyajñähdiy coo højts hänajty xqui'u'ughada'añ. Jaduñ jim myiñ cujaay maa Diosmädia'aguiän coogä Elías ja'a miägunaax jecy ñäxø'øwøøyy, ja'a judíoshajxy, ja'a Diosmädia'agy hajxy hänajty quia'a mäßøgaambiä. Ja'a Elías, jequiän je'e quiuguexyhajtä Diósäm. Pia'yaaxypä Elías ja'a Dios hänajty coo jaduñ miänäxø'øwøøyy:

3 “Dios, yøø judíoshajxy, haxøøg hajxy tøø jiatcø'øý. Tøø miich mguguexyhajxy xyagho'cä. Tøø tsaamaa'xy hajxy yajma'ady maa animalho'ogy hajxy hijty ño'oguiän coo miich hajxy hijty xwyiingudsähgø'øý. Nägøxiä jäya'ayhajxy tøø yagho'ogyii, ja'a miich hajxy hijty xwyiingudsähgøøbiä. Nidiúhmhøch tøø nmähmø'øý jujcy. Høøchpaady hajxy xjia wi'i yagho'ogaambä”, nømä Elías ja'a Dios jecy ñämaayy.

4 Mänitä Dios yhadsooyy: “Caj tiøyyä cooçh miich nidiuhm xjiaac wiingudsähgø'øýñä. Jé'enøçhä jäya'ayhajxy xwyiingudsähgø'øýñä ja'a hajxy näjuxtujmilpä. Cabä Baal hajxy wyiingudsähgø'øý. Quepychech je'e ja'a Baalhajpä”, nømä Dios jecy miänaañ.

5 Ja'a judíoshajxy, jequiän hajxy jaduhñ yajnähdijjä ja'a Diósäm coo hajxy hänajty quiu'ughada'añii. Paady hajxy jaduhñ quiu'ughadyii coo Dios hojioot jiaançh tehñ miøødä. Pero näweeñtiä judíos ja'a Dios miädia'agy hajxy miäbøjcä, caj ñämayyä. Jäda'anäbaadyñä, jiinä judíos ja'a Dios miädia'agy hajxy näje'e miäbøjcä. Je'enä hajxy quiu'ughadyiinä ja'a Diósäm. Coo hajxy jaduhñ ñäxuuçhii, paady hajxy je'enä wioowhidyyii, jaduhñä Dios miädia'agy tehngajnä miäbøjcäxät.

6 Jaduhñä judíoshajxy yajnähdijjä coo ja'a Dios miädia'agy hajxy miäbøjcät ja'a Jesucristocøxpä. Paady hajxy jaduhñ yajnähdijjä je'eguiøxpä coo Dios hojioot miøødä, ca'a jie'eguiøxpä coo hajxy hoy jiäya'ayhaty. Coo jäya'ayhajxy häxøpy ñäxuuçhii ja'a Diósäm je'eguiøxpä cooc tyijy hajxy

hoy jïaya'ayhaty, cab hajxy jaduhñ cu nmánaañäm coo Dios hojioot miøødä.

⁷ Hix, näje'e judíoshajxy yajnähdiijä coo hajxy ñähwá'adsät näweeñtiä. Jaduhñä Dios miädia'agy hajxy miäbøjcä ja'a Jesucristocøxpä. Ja'a judíoshajxy nämaybä, cab hajxy jaduhñ yajnähdiijä, hoy hajxy hñajty jaduhñ jia wi'i ñähwa'adsa'añ. Hix, xeix ja'a quiopcä tiaatsc-hajxy jaduhñ. Cabä Dios miädia'agy hajxy miäbøjcä ja'a Jesucristocøxpä.

⁸ Jaduhñ jim myiñ cujaay maa Diosmädia'aguiän: “Tøø quiopcä tiaatsc-hajxy yajxéxäxä ja'a Diósäm. Jaduhñ hajxy yhity nebiä wiindspän nebiä cuhnätpäñ høxtä jäda'anäbaadyñä.”

⁹ Jaduhñä David jecy quiujahbiä:

Xøødsuu ja'a judíoshajxy naxy yagjájätäp. Jadúhñäc tyijy ja'a Diosmädia'agy hajxy hoy quiudiuñ.

Jadúhñäc tyijy hajxy quiumayii ja'a Diósäm. Pero ween hajxy hoy quiumädoy. Hix, cab hajxy tøyhajt miäbøga'añ.

¹⁰ Ween hajxy jaduhñ jiaty nebiä wiindspän nebiä xoodspän.

Ween hajxy ni mänaa quia'a wiinjuø'øy nebiä piojpä quiädieeyhajxy ñähwá'adsät.

Jaduhñä David jecy quiujahy.

¹¹ Hoorä, nämayyä judíoshajxy tøø quia'a mäbøcy ja'a Jesucristocøxpä. Pero cab hajxy nägøxiä ñajtshixø'øwa'añii ja'a Diósäm. Cab hajxy nägøxiä quiumädowa'añ. Pero jaduhñä Dios wyiinmaayy coo jäya'ayhajxy ween miäbøcy ja'a

Jesucristocøxpä, ja'a hajxy ca'a judíospä. Coö ja'a ca'a judíoshajxy ñähwaatsnä, paadiä judíoshajxy näje'e jia mänaambä coö hajxy ween ñähwáatspät.

¹² Coö judíoshajxy quia'a mäbøjcy ja'a Jesucristocøxpä, paady hajxy paquiä ñajtshixøøyyä ja'a Diósäm. Pero mänitä Dios wyiinmaayy coö jäya'ayhajxy ween ñähwa'açh wiinduhmyhagajpt, ja'a hajxy cajpä judíos. Paadiä judíos ja'a quiopcä tiaatsc-hajxy yajxéjxäxä ja'a Diósäm. Paadiä hoyhajtä weenhajt hajxy quia'a mooyyä ja'a Diósäm. Cu miooyyä hajxy jaduñ coö hajxy cu miäbøjcy ja'a Jesucristocøxpä. Pero ja'a jäya'ayhajxy ca'a judíospä, ja'a hajxy jim tsánaabiä wiinduhmyhagajpt, je'edsä hoyhajtä weenhajt mäbøcypiä mooyyä. Hoorä, habaadaamb jaduñ coö judíoshajxy miäbøgaambä ja'a Jesucristocøxpä. Mänit hajxy je'e ñähwa'adsaambä. Jaançh tehñ jiootcuyc hajxy jaduñ yhidáañnäbä. Mänitä jäya'ayä hoyhajtä weenhajt hajxy maas may jiaac mo'owa'añii wiinduhmyhagajpt.

¹³ Mijts jaduñ ca'a judíoshajpä, mijts nya-jwiinmädiaagøñäp. Dióshøch jaduñ tøø xwyi-inguexy coöchä miädia'agy jim nyajwá'xät maa mijtsän. Xtiuungmóoyyhøchä Dios jaduñ. Nägø'ø nädécypiøchä nduunç jaduñ nnä'ägä tuñ,

¹⁴ ween mijts nämay mmäbøcy ja'a Jesucristocøxpä, ween mijtsä judíos jaduñ xpiahixy. Coö mijtsä judíos jaduñ xyhíxät coö mijtsä Dios ja'a hoyhajtä weenhajt tøø xmio'oy, mänitä judíoshajxy miäbøgaambä ja'a Jesucristocøxpä. Høøch nmägunaaxhajxy je'e ja'a judíoshajxy. Ween hajxy jaduñ ñähwáatspät neby

mijts tøø mnähwa'ačhän.

15 Coo judíosahajxy quia'a mähbøjcy ja'a Jesucristocøxpä, paady hajxy ñajtshixøøyyä ja'a Diósäm. Paadiä Dios hänäjty tøø wyiinmay coo mijtsä miädia'agy mmähbøjcänät, pønjaty jaduhñ ca'a judíospä. Y coo judíosahajxy jaduhñ miähbøjpät ja'a Jesucristocøxpä, mänit hajxy quiuhbøgáañägumbä ja'a Diósäm. Mänit hajxy yagjgyhada'añii homiänaajä ja'a Diósäm neby jaaya'ay jiugyhatiän.

16 Ja'a judíosahajxy, ja'a Abraham hajxy jecy yhaphajt tieedyhajt. Yhaadshajt tyictshajt ja'a Abraham hajxy jaduhñ. Jéquiänä Dios ja'a Abraham quiu'ughajty. Paadiä judíosahajxy jädä'ahaty quiu'ughájtäbä ja'a Diósäm. Jaduhñ mäwiinä Abraham miäbaady nebiä quepytyictsän. Y ja'a judíosahajxy, jaduhñ mäwiin hajxy miäbaatpä nebiä quepyhaa'xän.

17 Hoorä, nämayyä judíosahajxy tøø quia'a mähbøcy ja'a Jesucristocøxpä. Paady hajxy tøø ñajtshixø'øyyi ja'a Diósäm. Jaduhñ mäwiin hajxy miäbaady nebiä olivohaa'x tøø piuhdøjjiän. Jaduhñ miädia'agytiägø'øyy coo judíos ja'a hoyhajtä weenhajt hajxy quia'a mo'owáañänä ja'a Diósäm. Y mijts ca'a judíospä, jaduhñ mäwiin hajxy mmäbaatpä nebiä yuuc-holivohaa'xän coo tøø yagjøjheedsø'øyy maa olivohaa'x tøø piuhdøjjiän. Coo hajxy tøø mmähbøjnä, paadiä Dios hajxy xmiooñä ja'a hoyhajtä weenhajt.

18 Pero caj mijtsä judíos hawiinmats mbéxät. Ca'a hajxy mniguiumayii. Cab hajxy mmäná'anät: “Cabä judíosahajxy quiu'ughájtänä ja'a Diósäm.

Højtsä Dios xquiu'ughájtänäp, højts ca'a judíospä.” Hix, Dios mijts jaduñ tøø xquiunuu'xy je'eguiøxpä coo Abraham jecy quiunuu'xä møødä yhap møødä yhoc, ja'a judíoshajxy. Coo Dios ja'a Abraham jecy cu quia'a cunuu'xy, ni mijts hijty xquia'a cunuu'xaambä.

19 Wehñdä pøn miáná'anät: “Yø'ø judíoshajxy tøø quia'a mæbøquiäbä ja'a Jesucristocøxpä, høøchcøxpä hajxy tøø ñajtshixø'øyii ja'a Diósäm. Hix, páadyhøchä Dios xchocy coöch nga'a judíosä. Cabä judíoshajxy chójcänä ja'a Diósäm.”

20 Tøyhajt jaduñ. Paadiä judíoshajxy tøø ñajtshixø'øyii ja'a Diósäm coo hajxy tøø quia'a mæböcy ja'a Jesucristocøxpä. Y mijts, coo hajxy tøø mmæböcy, paady mijtsä Dios tøø xquiunuu'xy. Pero ca'a hajxy mniguiumayii coo Dios hajxy jaduñ xñä'ä najtshixø'øbiät. Hix, caj mijts hijty hoy mjäya'ayhaty. Coo Dios hojioot miøødä, paady hajxy xquiunuu'xy.

21 Jaanč tehñ yajcumayaambä judíoshajxy jaduñ. Paady hajxy jaduñ ñiguiumayii coo hajxy tøø quia'a mæböcy coo hajxy tsipcøxp ñäxuudsø'jät ja'a Diósäm. Paady hajxy ñajtshixø'øyyä ja'a Diósäm, hoyä Abraham hajxy jecy jia haphajty jia teedyhajty. Jaanä jaduñ mijtspä, mijts ca'a judíospä, coo mijts jaduñ mniguiumáayyäbät, mänitä Dios hajxy jaduñ xñajtshixø'øbiät.

22 Hix, jiaanč tehñ quiunuu'xypä Dios ja'a quiu'ug. Pero pønjetiä Dios tøø ñajtshixø'øy, je'eds hajxy jaduñ jaanč tehñ yajcumäadowáanäp ja'a Diósäm. Paady mijtsä Dios xjiaanč tehñ quiunuu'xy, coo hajxy mmæböcy. Pero pø cab

hajxy jaduhñ mmäbøgaanñä, mänitä Dios hajxy xyajcumädowaambä.

²³ Hoorä, ja'a judíoshajxy tøø quia'a mäbøquiäbä, coo hajxy jaduhñ miäbøjpät, mänit hajxy jadähooc quiu'ughájtägumbät ja'a Diósäm. Haa ca'a, miøødä Dios mäjaa jaduhñ coo hajxy jaduhñ quiu'ughájtägumbät.

²⁴ Hix, ja'a judíoshajxy, Abraham hajxy jecy yhaphajt tieedyhajt. Jéquiänä Abrahamhajxy yajnähdijjä ja'a Diósäm coog hajxy jaduhñ quiu'ughadøøjät ja'a Diósäm, møødä Abraham yhap yhoc-hajxy, ja'a judíoshajxy. Tøyhajt jaduhñ, paadiä Abrahamhajxy paquiä hoy quiu'ughadäänägumbä Diósäm. Y mijts, jaanä jaduhñ mijtsä Dios xquiu'ughájnäbä, hoy mijts hijty jegyhajty xquia'a cu'ughaty. Paady, ca'a hajxy mmäna'añ cooc tyijy ja'a judíoshajxy quia'a cu'ughajtgatsa'añii ja'a Diósäm.

²⁵⁻²⁶ Mägu'ughajpädøjc, nébiøch cham nmädia'aga'añän, náamnøchä Dios tøø xñajtsapxøøyyä. Cahnä jäya'ay hädaa mädia'agy hajxy nämay miädoyñä. Paady mijts jaduhñ nhawáanäm, jaduhñ hajxy mga'a niguiumayøøjät, hoyyä Dios hajxy tøø xjia cu'ughaty. Tøyhajt jaduhñ coo judíoshajxy nämay tøø quia'a mäbøcy ja'a Jesucristocøxpä. Pero habaadaamb jaduhñ coo hajxy nägøxiä miäbøgaanñä. Mänit hajxy jaduhñ miäbøga'añ coo mijts hänajty tøø mmäbøcy, ja'a mijts ca'a judíospä, mäduhñtiä hajxy hänajty mmäbøga'añ. Jaduhñ jim myiñ maa Diosmädia'aguiän:

Mänitä yajnähwatpä jim choona'añ maa ca-

jpt jaduñ xiøhatiän Siön, maa judíoshajxy chána'ayän.

Cøxaambä judíoshajxy jaduñ miäbøga'añ ja'a yajñahwaatspäcøxpä. Cøxaambä piojpä quiädieeybä hajxy ñähwa'adsa'añ.

27 Cooch hajxy jaduñ nyajñahwá'adsät, mänit jaduñ tiøjiada'añ nébiøch hajxy hijty tøø nyajwiinwaanø'øyän mänáajøch hajxy nmøødyajcuhduquiän hawiinjemy, nømä Dios miänaañ.

28 Coo judíoshajxy tøø quia'a mäbøcy ja'a Jesucristocøxpä, paady hajxy tøø ñajtshixø'øyii ja'a Diósäm. Y coo hajxy jaduñ tøø ñajtshixø'øyii, paady mijtsä Dios tøø xyajñahdijy coo hajxy mmäbøgät ja'a Jesucristocøxpä, mijts ca'a judíospä. Pero, hoyyä judíoshajxy tøø quia'a jagä mäbøcy, tsójcäpnä hajxy jaduñ ja'a Diósäm je'eguiøxpä coo yhapä tieedyhajxy jecy yajñahdíjjäxä ja'a Diósäm coo hajxy quiu'ughadøøjtät.

29 Hix, cabä Dios mänaa yhøhnda'agy. Homiänaajä yajtøjiaty waambaty quiapxy miädia'agy. Y coo Dios jaduñ jecy miänaañ coogä judíoshajxy homiänaajä quiu'ughada'añii, yejcä Dios ja'a tøyhajt jaduñ. Hix, cabä Dios ja'a miädia'agy mänaa yajtägach. Jaduñnä tøyhajt hajxy nmøødhájtäm coo Dios jiaançh yajtøjiada'añ waambaty tøø miäna'añ ja'a judíoscøxpähajxy.

30 Mijts ja'a ca'a judíospä, cabä Diosmädia'agy hajxy hijty mmädooyyä. Cabä Dios hajxy hijty mwiingudsähgø'øy. Y coo judíoshajxy tøø quia'a mäbøcy ja'a Jesucristocøxpä, paadiä Dios hojiot miøødä ja'a mijtsøxpä.

31 Jäda'anäbaadyñä, cabä judíos ja'a Dios miädia'agy jäda'ahaty miäbøgaanä ja'a Jesucristocøxpä. Coö hajxy jaduñ quia'a mäbøga'añ, paady mijtsä Dios xñäxuu'tsnä, mijts ca'a judíospä. Hoorä, coö mijtsä judíos xyhíxät coö mijtsä Dios xñäxuuč, mänit hajxy jaduñ miäbøgaambä ja'a Jesucristocøxpä. Mänit hajxy ñäxuuudsáañäbä ja'a Diósäm.

32 Jéquiänä Dios jäya'ay yhawaanä nägøxiä coö pojpä cädieey hajxy miøødä, møødä judíoshajxy, møødä ca'a judíoshajxypä. Jaduñ hajxy jecy yhawáañäxä coö hajxy hawiinmats quiumädowät. Hix, paadiä Dios jaduñ miänaañ, je'eguiøxpä coö jäya'ayhajxy hñajty nägøxiä ñäxuuudsä'añii tu'cuñdujt, møødä judíoshajxy, møødä ca'a judíoshajxypä. Coö Dios hajxy häxøpy tøø xquia'a näxúu'tsäm, nägøxiä hajxy hijty ngumädowáañäm.

33 Jaanč tehñ jiajp, jaanč tehñ ñajuøøbiä Dios. Cab hajxy hoy nnä'ägä wiinjuø'owáañäm nebiatiä Dios wyiinmay. Hix, hojiootä Dios jiaanč tehñ miøød coö hajxy nägøxiä tøø xñäxúu'tsäm, møødä judíoshajxy, møød cäjpä judíoshajxy. Nägøxiä ja'a hoyhajtä weenhajt hajxy xmio'owáañäm tu'cuñdujt.

34 Jaduñ jim myiñ cujaay maa Diosmädia'aguiän: "Cabä Dios ja'a wyiinmahñdy pøñ ñajuøøyyäxä. Cabä Dios pøñ miäyajtøy nebiä wyiinmahñdyhädät.

35 Cabä Dios pøñ miänuu'xyhaty."

36 Hamdsoojootä Dios ja'a naaxwiimbä jecy yhädiuñ møødä jäya'ay nägøxiä. Tijaty yaa jájtäp túuñäp hädaa yaabä naaxwiin, ja'a Dios jaduñ

hanehm̄b coo jaduññ jiadóøjät, coo jaduññ tiunóøjät. Y tijaty jaduññ jadáanäpnä tunáanäpnä, ja'a Dios jaduññ yajtøjiadaamb nebiaty hánajty tøø wyiinmay. Tsøgä Dios hajxy mõj jaančh pädáacäm homiänaajä. Tsøg hajxy homiänaajä wiingudsähgøøyyäm. Amén.

12

¹ Mägu'ughajpädøjc, miøødä Dios hojioot maa højtscøxphájtäm. Chamčh mijts nhane'emy coo hajxy hamuumdu'joot mniyegóøjät Dios quiø'øjooty tiecyjiooty. Jaduññä Diosmädia'agy hajxy hoy mgudiúnät hamuumdu'joot. Jaduññä Dios hajxy hoy mwiingudsähgø'øwät nebiä Dios hajxy xyajmädsoquiän.

² Ca'a hädaa wiinmahñdy hajxy myajtuññ nebiä jäya'ay wyiinmahñdyhajxy yaajän. Pønjetiä Dios quia'a cu'ughajpy, je'eds hädaa yaabä wiinmahñdy hajxy yajtuumb. Cabä yhaxøøgwiinmahñdy hajxy ñajtshixø'owa'añ. Ca'a hajxy mbahixy. Hawiinjemybiä wiinmahñdy hajxy jaduññ mmøødhájñäp, je'eguiøxpä coo Jesucristo hajxy mmøødhijnä tu'ugjoot tu'ugwiinmahñdy. Jaduññä tøyhajt hajxy mmøødhádät tijatiä Dios hajxy xyajmädsojp coo hajxy mdúnät. Homiänaajä Dios hajxy xyajmädsójcäm coo hajxy hoy njäya'ayhájtämät, coo hajxy hoy ndúunämät. Coö hawiinjemybiä wiinmahñdy hajxy jaduññ nmøødhájtämät, jaduññä tøyhajt hajxy jaduññ nmøødhájtämät tijatiä Dios hajxy xyajmädsójcäm coo hajxy ndúunämät.

³ Mayhajtä Dios jaduññ ñä'ä tuun ja'a høøhcøxpä coöchä cuhdujt jaduññ xmiooyy

cooĉ mijts nmägäp̄x nhané'emät. Ca'a hajxy mniguiumayii cooc tyijy hajxy cøxiä wiinä mjaanĉ teh̄m jiaty. Tijatiä tuungä Dios hajxy tøø xmio'oy, je'eds hajxy mmøjpäda'agäp̄. Ca'a wiingtuung hajxy mmøjpäda'agy. Hoy hajxy mdúnät nebiatiä Dios hajxy tøø xyajnähdijy.

⁴ Hix̄, nägøxiä ni'xcopc hajxy nmøødhájtäm møødá cø'ødecy, møødá wiinjøjp̄, møødá copc-taatsc. Cab hajxy tiu'ugtuungä; haagä hawiingjaty hajxy tiuñ̄. Pero haagä tuungpaatp hajxy jaduh̄n.

⁵ Jaduh̄n mäwiin højts nmäbáatäm nebiä tu'ugni'x tu'ugcopcän coo hajxy tu'cuhdujt nmäbójcäm ja'a Jesucristocøxpä, hoy hajxy nja nämayhájtäm. Jaduh̄n hajxy hawiingjaty ndúunäm. Jaduh̄n hajxy nnibiuhbéjtäm hamiñ̄ haxøpy.

⁶ Tsøghädaa tuung hajxy hoy yajnöcxäm nebiatiä Dios hajxy tøø xyhanéh̄mäm. Mayhajtä Dios jaduh̄n tiuun̄ coo wiinmahñdy hajxy cøjwiinduum xmióoyyäm nebiaty hajxy ndúunämät. Pønjaty tøø tiuungmo'oyii coo Dios ja'a miädia'agy hajxy yajwá'xät nebiaty hajxy hánajty tøø ñajtsapxøøyyäxä, ween hajxy jaduh̄n yajwa'xy nebiaty hajxy hánajty piuhbedyii.

⁷ Pønjaty tøø tiuungmo'oyii coo hajxy miäbuhbédät, ween hajxy hamuumdu'joot tiuñ̄. Pønjaty tøø tiuungmo'oyii coo Diosmädia'agy hajxy yajwá'xät, ween hajxy hoy yajwa'xy.

⁸ Pønjaty tøø tiuungmo'oyii coo hajxy miäjootcapxmøcpøgät, ween hajxy hoy tiuñ̄. Pønjaty mäyøø, weenä häyoobä hajxy piuhbety hamuumdu'joot. Pønjaty tøø tiuungmo'oyii coo

hajxy miähané'emät maa tsajtøjcän, ween hajxy hoy miähane'emy. Hix, Dios ja'a cuhdujt jaduñ yejc coo hajxy jaduñ miähané'emät. Pønjaty tøø tiuungmo'oyii coo mayhajt hajxy tiúnät maa häyoobädøjcän, møød maa yaamgto'oxyhajxiän, ween hajxy hamuumdu'joot piuhbety. Møød weenä pa'amjäya'ay hajxy quiuhixy.

9 Tsøg hajxy hamuumdu'joot ničójcäm nibia'häyóowäm. Tsögä haxøøgpä hajxy najtshixøøyyäm. Tehngajnä howyiinmahñdy hajxy tsøc tsójcäm.

10 Hamiñ haxøpy hajxy mničhogøøjät mnibia'häyowøøjät neby tu'ugpuhya'ay neby tu'ugpuhdo'oxypän. Hamiñ haxøpy hajxy mniwyiingudsähgø'øwøøjät. Cab hajxy mnibiexøøjät.

11 Hamuumdu'jootä Wiindsón Jesucristo hajxy mmädúnät. Jootcujc hajxy jaduñ mdúnät. Cab hajxy jaduñ mänaa mnänuuxø'øwät.

12 Coo hajxy pøn xchaaçhtiúnät, cab hajxy mmøjpädá'agät; mmee'xtúgäp hajxy jaduñ. Mna-juøøby hajxy jaduñ coo hajxy jim mnøcxa'añ maa Dioswiinduumän. Paady hajxy jaduñ mx-oondá'agät. Homiänaajä Dios hajxy mba'yá'axät.

13 Coo pøn tii yajmaajiádät, naxy hajxy mdehm piuhbedät. Je'eçh jaduñ nnänøømby pøn jaduñ mäßøjp ja'a Jesucristocøxpä. Pønjaty jaduñ mejtsp maa mdøjc-hajxiän, myajtøjtägø'øwäp hajxy je'e. Myajcáyäp myaghú'ugäp hajxy jaduñ.

14 Coo hajxy pøn xchaaçhtiúnät, cab hajxy mmahanhádät. Pero mmänuu'xtá'agäp ja'a Dios hajxy coo hajxy ween ñähwa'açh.

15 Pønjaty xoon_{nda}acp, mmøødxoon_{dá}'agäp hajxy je'e. Pønjaty jøøby xuu'tsp, mmøødjø'øw mmøødxúudsäp hajxy je'ebä.

16 Tu'ugcopc tu'ugwiinmahñdy hajxy mnim-iøødhidøøjät. Cab hajxy pøn mbéxät. Jootcujc hajxy mhídät, hoyyá møjtuung hajxy mga'a jagä møødä. Cab hajxy mänaa mniguiumayøøjät.

17 Coö häna'c hajxy xyhäyoowhíxät, cab hajxy myaghawiimbijtagátsät. Hoy hajxy mjäya'ayhádät, jaduñnä Dios hajxy jaduñ xquiumáyät; jaduñ mijtsä cu'ug waamb xquia'a nänómät. Pero xwyiingudsähgø'øwäbä cu'ug hajxy jaduñ.

18 Coö mijtsä cu'ug xjia wi'i jiojcapxø'øwät coö hajxy jaduñ mbahíxät nebiaty hajxy haxøøg jiatcø'øyän, cab hajxy jaduñ mbahíxät. Pero coö hajxy waamb xquia'a nämá'awät, mänit hajxy hoy yajxón mmøødmädiá'agät. Cab hajxy pøn mmädsiphádät.

19 Mägu'ughajpädøjc, coö hajxy pøn xyhäyoowhíxät, cab hajxy myaghawiimbijtagátsät. Dios jaduñ yaghawiimbídäp. Jaduñ jim myiñ cujaay maa Diosmädia'aguiän coögä Dios jaduñ miänaañ: "Høøch jaduñ nyaghawiimbídäp."

20 Coö hajxy pøn xmiädsiphádät, cab hajxy mmädsiphajtagátsät. Jaduñnä Diosmädia'agy miänaañ: "Pø yähó'cäbä häna'c ja'a miich hänäjty jaduñ xmiädsiphajpä, myajcáyäp myaghú'ugäp jaduñ. Pø tødsøøyyäp, mmó'owäbä nøø. Coö jaduñ mgudiúnät, hoyhoyyä häna'c chähdiúnät, ja'a miich hänäjty jaduñ xmiädsiphajpä."

21 Nägüeeñtä hajxy mhídät, cabä haxøøgpä

hajxy myaghawiimbijtägätsät. Coo hajxy jaduhñ mjatc'ó'owät, myajcähx'ógäp hajxy jaduhñ coo mhaxøøgwiinmahñdy hajxy hñajty tøø mbadu'ubøjcumbä. Pero coo häna'c hoy yajxón mmägápxät, ja'a mijts hñajty xmiädsiphajpä, jaduhñ hajxy myajcähx'ógät coo hawiinjemybiä wiinmahñdy hajxy hñajty mmøødhajnä. Mänitä Dios jaduhñ xquiumáyät.

13

¹ Tsøg hajxy nägøxiä cudiúunäm nebiatiä cud-uunğ hajxy xyhanéhmäm. Hix, Dios ja'a cuhdujt møc møød. Je'e ja'a cuhdujt yejp jadähooc. Pønä cuhdujt møød, paady jaduhñ miøødä coo tøø mio'oyii ja'a Diósäm.

² Pøn jaduhñ ca'a cudiunaamb nebiatiä cuduunğ jia hane'emiän, quiumädoowaamby hajxy je'e. Hix, ja'a Dios ja'a cuduunğ pädaac coo yhané'emät. Jaduhñds je'e, pø cab hajxy jaduhñ mgudiuna'añ nebiatiä cuduunğ yhane'emiän, jaduhñ miäbaady coo Dios miädia'agy hajxy mga'a cudiunaanä.

³ Pønjaty hoy wädijp, cabä cuduunğ hajxy chähgø'øy. Pero pønjaty hoy ca'a wädijp, je'eds mäbøcypiä tsähgøøby. Coo hajxy hoy mwädität, mänitä cuduunğ hajxy xquiumáyät. Cab hajxy jaduhñ xchaaçhtiúnät.

⁴ Hix, ja'a cuduunğhajxy, moonsähájtäp hajxy je'e ja'a Diósäm. Paady hajxy jaduhñ tiuñ, coo mijts hajxy jaduhñ xwioowhídät. Jaduhñä cuhdujt hajxy tøø mióoyyäbä coo mijts hajxy xyajcumädówät coo mijts hñajty tøø mgädieey. Paady hajxy jaduhñ mdsähgø'owät.

5 Naxy hajxy mdehm̄ quiudiúnät nebiatiä cuduunḡ hajxy xyhane'emiän, coo Dios hajxy jaduñ xñä'ä yajcumädówät. Jaaná jaduñduhmbä, coo hajxy hamdsoo mnajuø'øy coo jaduñ yahixø'øy coo hajxy hoy mwädítät, paady hajxy jaduñ mgudiúnät waambatiä cuduunḡ hajxy xyhane'emiän. Coo hajxy jaduñ mga'a cudiúnät, cab hajxy jootcujc mhídät, je'eguiøxpä coo hajxy hánajty mnajuø'øy hamdsoo coo hajxy hánajty tøø mgädieey.

6 Jaaná jaduñduhmbä, tsipcøxp hajxy mnähjuudiú'udät tijaty häna'c hajxy xyajnämaaby coo hajxy mnähjuudiú'udät. Hix, ja'a Dios ja'a cuhdujt jaduñ yejc coo mijtsä häna'c jaduñ xyagjúyät.

7 Hahixøøby jaduñ coo cuduunḡ hajxy mmájúyät nebiaty hajxy xyajnäma'ay. Jaaná jaduñ yahixøøbiä coo cuduunḡ hajxy mwiingudsähgø'øwät, miøjjä miuutscä.

8 Naxiä mnuu'xy hajxy mdehm̄ jiah-miédsät. Naxy hajxy mničhogø'øjät nebiä tu'ugpuhya'aybän, nebiä tu'ugpuhdo'oxypän. Hix, pøn wiinghäna'c tsojp, hoy jaduñ quiudiuñ nebiatiä Dios hajxy xyhanéhm̄äm.

9 Jaduñä Diosmädia'agy miäna'añ: “Pø jim̄ miich̄ mdo'oxiøjc, cabä wiingpä mmøødhídät. Cab mmäyaghó'ogät. Cab mméedsät. Cabä mmädøjcä jie'e mhadsójcät.” Hoorä, coo wiinghäna'c mdsógät hamuumdu'joot, hoy jaduñ mgudiúnät nébiøch̄ naamnä tøø nmädia'aguiän.

10 Hix, pøn wiinghäna'c jaanč̄ tsojp hamuumdu'joot, cab jaduñ mänaa

yhäyoowhixa'añ. Hoorä, coo wiinghäna'c mjaančh tsógät hamuumdu'joot, hoy ca'xy mgudiúnät nebiä Dios yhane'emiän.

¹¹ Naxy hajxy jaduhñ mdehm ñičhogóójät. Hix, mnajuøøby hajxy jaduhñ coo tøø jiecy mänaa hajxy tøø mmäbøquiän. Habáatnäp jaduhñ coo Jesucristo hajxy miñ xyajpäð'ogáañäm, coo hajxy jim xyajnøcxáañäm tsajpootyp. Nägüeentä hajxy jaduhñ mwädítät. Hix, cab hajxy nna-juøøyyäm mänaa Jesucristo yaa quiädaactägatsa'añ, coo hajxy jaduhñ xñä'ä nähgädaacpéjtämät. Hix, coo jaduhñ quiädaactägátsät, mänit hajxy xyajtøyhajtyegáañäm.

¹² Habáatnäp jaduhñ coo hajxy yaa nd-soonáañäm, coo hajxy jim nnøcxáañäm tsajpootyp. Tsøcxä ja'a haxøøgpä hajxy najtshixøøyyäm neby hajxy yaa tøø njäya'ayháltäm, cahnä Dios hajxy hánajty nwiingudsähgøøyyäm.

¹³ Tøø Dios hajxy xyajnáhdíjjäm coo hajxy homiänaajä njugyháltämät neby je'e jiugyhatiän. Paadiä Diosmädia'agy hajxy hoy nbanøcxáañäm. Tsøcxä hajxy hoy wädíjtäm, ca'a jiaduhñä nebiä häna'c-hajxy hagoodstuum wädijpäñ. Cab hajxy mhaxøøghu'ug mhaxøøgjøø'xät. Cab hajxy comjaty mhú'ugät. Cab hajxy jim mnøcxät maa cuhindø'oxiøjc-hajxiän. Tsøgä to'oxiøjc hajxy wiingudsähgøøyyäm. Hix, ja'a cu'ug hajxy xyhíjxäm neby hajxy njäya'ayháltäm, pø hoy, pø caj. Cab hajxy haxøøg mnä'ägä jatc'øwät. Cab hajxy pøñ mmähänhádat, hoy hajxy jia mäyøøjä que mijts. Cab hajxy tii mmädsib'øwät.

¹⁴ Ja'a Jesucristo hajxy nWiindsøn'háltäm. Je'e

hajxy xyhanéh_mäm. Jaančh teh_m yhoy je'e wyiinmahñdyhaty. Naxy hajxy jadu_hñ mdehm miøødhídät tu'ugjoot tu'ugwiinmahñdy. Jaduhñä mhaxøøgwiinmahñdy hajxy hoy mhø_xhíxät. Jaduhñ hajxy hoy mhäna'c-hádät.

14

¹ Jii jäya'ayhajxy näje'e, cahnä Diosmädia'agy hajxy hoy yhabøcyñä, hoy hajxy tøø jia mäßøcy ja'a Jesucristocøxpä. Hahixøøby jadu_hñ coo hajxy mmägu'ughádät. Pero cab jadu_hñ yahixø'øcy coo mädia'agy hajxy mmøødyajyónät ja'a cuhdutjøxpä.

² Pøn_jatiä Diosmädia'agy hoy tøø yhabøcy, ñajuøøby hajxy je'eduhñ coo jadu_hñ yhawiinmatsä coo hotyijä mgáyät. Pero pøn_jaty hoy tøø quia'a habøcy, cábäc tyijy yhoyyä coo tsu'učh ndsú'tsämät. Páadiäc tyijy quia'a hoyyä coo tsu'učh ndsú'tsämät, yajnajuøøby jadu_hñ coo häna'c ja'a tsu'učh hajxy hān_jty tøø quiunuu'xy maa habo_jtsnaxy wyiinduumän. Jaduhñäc tyijy miäbaady néjjiämä habo_jtsnaxy jadu_hñ mwiingudsähgøøbiän.

³ Hoorä, pø mdsu'chp miichä tsu'učh, cab jadu_hñ mbéxät ja'a häna'cä tsu'učh ca'a tsu'tspä. Jaanä jadu_hñduhmbä, pønä tsu'učh ca'a tsu'tsp, cab jadu_hñ waamb ñämá'awät ja'a häna'cä tsu'učh tsu'tspä cooc tyijy jadu_hñ quiädieey. Haa ca'a, ja'a Dios yhuung je'ebä.

⁴ Cabä cuhdutj jadu_hñ myiñ coo waamb mnämá'awät pønä Diosmädia'agy panøcxp. Haa ca'a, ja'a Dios ja'a mioonsä je'ebä. Jagooyyä Dios cuhdutj jadu_hñ miøødá coo miäná'anät pø

hoyyá mioonsä quiudiuñ, pø caj. Hamdsoojä Dios jaduñ ñámá'awät neby hoy wiädítät. Haa ca'a, ja'a Dios je'e hanehmb.

⁵ Näje'ejä jäya'ayhajxy miäna'añ coo poo'xxiøø jyijä mädyii hajxy yhamajtsc-hádäp. Näje'e hajxy miänaambä coo Dios hajxy homiänaajä nwiingudsähgøøyyämät. Pero mijts, jaduñ hajxy mgudiúnät nebiä Dios hajxy hamdsoo tøø xyajwi-injuø'øyän.

⁶ Hix, pønjaty jaduñ mänaamb coogä poo'xxiøø jyijä, nägüeentä hajxy jaduñ wiädity ja'a poo'xxiøøjooty. Jaduñä Dios hajxy wyiingudsähgø'ø. Jaanä jaduñduhmbä, pønjaty jaduñ mänaamb cooc jaduñ quia'a cädieeyä coo tsu'učh ndsú'tsämät, hoy hānajty tøø jia cunuu'xyii maa habojtsnaxy wyiinduumän, mioobiä Dios Dioscujú'uyäp jaduñ coo jaduñ yajcayii. Jaanä jaduñduhmbä, pøn jaduñ mänaamb cooc jaduñ quia'a hoyyá coo tsu'učh ndsú'tsämät, jaanä jaduñä Dios Dioscujú'uyäp mioobiä coo jaduñ yajcayii.

⁷ Coo Diosmädia'agy hajxy nmäbójcäm ja'a Jesucristocøxpä, paady hajxy xmioonsähájtäm. Paady jaduñ quia'a hahixø'ø coo hajxy njäya'ayhájtmät nebiä nhamdsoojoot hajxy chójcäm. Ni ja'a cuhdujt hajxy nga'a møødhájtäm coo hajxy hamdsoo nniyajnähdíjjämät mänaa hajxy nho'ogáañäm ndägoyyáañäm.

⁸ Ja'a Jesucristo hajxy xmioonsähájtäm mäduhñtiä hajxy yaa njugyhájtäm, hoy ñejpiä hajxy cu nja jajt cu nja habéjtäm. Y coo hajxy nho'c coo hajxy ndägóoyyämät, je'enä hajxy hānajty

xmioonsähadáañäm homiänaajä.

⁹ Coo ja'a Jesucristo hajxy xñähho'túutäm, mänit jadähooc jiuypiojtägajch. Jaduhñ hajxy xquiu'ughájtäm, pønjaty jaduhñ mábøjp, møød hajxy tøø yhö'oguiäbä, møød hajxy jaac jujcypiä jaac tsuxpä. Jaaná jaduhñ hajxy xyhanéhmämbä.

¹⁰ Cabä mmägu'ughajpä hajxy hawiinmats mbéxät, hoyyä Diosmädia'agy hajxy hoy quia'a jagä habøcyñä. Cab hajxy pøn mnämä'awät cooc tyjy hajxy hoy quia'a cudiuñ, hoyyä wiingcuhdujt hajxy jia panøcxy. Hix, coo Jesucristo yaa quiädaactägätsät, mänit hajxy nägøxiä jim nmaxø'øwáañäm ja'a Jesucristo wyiinduum tøyhajtyejpä.

¹¹ Jaduhñ jim myiñ maa Diosmädia'aguiän:

Nägøxiøchä jäya'ayhajxy nøcxy xwyiinji-jna'awa'añ.

Xwyiingudsähgø'øwáambøch hajxy jaduhñ. Jaduhñhøch hajxy xquiapxpaadaambä cooch nidiuhm nDioshaty. Tøyhajt jaduhñ, nømä Dios miänaañ.

¹² Jaduhñ hajxy nyajnajuøyyäm coo hajxy nägøxiä jim nøcxy ndøyhajtyegáañäm Dioswiinduum.

¹³ Cab hajxy tsøc niñänøømänä cooc tyjy ja'a Diosmädia'agy hajxy hoy nga'a panøcxäm. Pero jaduhñ tsøc cudiuñäm nebiatiä mábøjpädøjc-hajxy quiudiuñän, jaduhñ hajxy waamb xquia'a nänøømämät. Pøn jaduhñ mänaamb cooc tyjy quia'a hawiinmatsä coo tsu'uçh ndsú'tsämät, pues, hahixøøby jaduhñ coo mga'a tsú'udsät coo hänajty mmøødhity. Hix,

wehndä miich jaduñ xpiadsú'udsät. Coo miich jaduñ xjiaanč padsú'udsät, cädiéeyäp je'eduhñ.

¹⁴ Cab jaduñ quiädieeyä coo tsu'uč ndsú'tsämat, hoy hñajty tøø jia cunuu'xyii maa habojtsnaxy wyiinduumän. Nmøødhøchä tøyhajt jaduñ. Hix, tu'ugmädiá'agyhøchä Jesucristo nmøødhity, ja'a nWiindsøñhajtämbä. Pero jii jäya'ayhajxy näje'e miäna'añ cooc tyijy quia'a hoyyä coo tsu'uč ndsú'tsämat. Coo hajxy jaduñ jiaanč tsú'udsät, ja'a hajxy jaduñ mänaambä, pues, cädiéeyäp hajxy jaduñ.

¹⁵ Hoorä, coo miichä tsu'uč jaduñ mdsú'udsät, y coo jaaya'ay jaduñ xpiahíxät, ja'a jaduñ mänaambä cooc tyijy quia'a hoyyä coogä tsu'uč mdsú'udsät, myajcädiéeyäp miich je'eduhñ. Pø jaanč tøy mdsocy, cab jaduñ myajcädiéeyät, je'eguiøxpä coo Diosmädia'agy miäböcy. Hix, ja'a Jesucristo jaaya'ay tøø ñähho'tu'udy. Pero coo myajcädiéeyät, wehndä Jesucristo miädia'agy ñajtshixøøyyäxät.

¹⁶ Y coo jaaya'ay jaduñ myajcädiéeyät, wehndä miich myajnänómät. Y wehndä jaaya'ay yajnänøømbät, ja'a Jesucristo miädia'agy tøø ñajtshixøøyyäbä. Jaduñds je'e, maas hoy hit jaduñ coo tsu'uč mga'a nä'ägä tsú'udsät, hoy jaduñ mja najuø'øy coo jaduñ quia'a cädieeyä coo mdsú'udsät.

¹⁷ Coo hajxy tøø nmäböjcäm ja'a Jesucristocøxpä, paadiä Dios hajxy xyhanéhmänä. Hix, cabä Dios waamb miäna'añ coo hajxy hotyijjä ngaayy nhúucäm; ni jaduñ quia'a mänaambä coo hajxy tii nga'a caayy nga'a húucämät. Coo Dios hajxy tøø xpiädáacäm hawa'adstuum, paady ha-

jxy hoy njäya'ayháltäm, paady hajxy jootcujc nnimiøødhíjtäm, paadiä Dioshespíritu hajxy xyajx-oondáacäm.

¹⁸ Hoorä, pønä Jesucristo miädia'agy jaduhñ cudiunáañäp, cumayáañäp je'e ja'a Diósäm møødá cú'ugäm. Tsøcxä hajxy jaduhñ cudiúunäm nebiä mäbøjpädøjc-hajxy quiudiuñän.

¹⁹ Mägu'ughajpädøjc, tsøgä hoybä hajxy tehñgajnä høxtáayyäm, jaduhñ hajxy jootcujc nnimiøødhíjtämät, jaduhñ hajxy hoy nniguiapxmøcpøjcämät, jaduhñä Jesucristo miädia'agy hajxy hoy ngudiúunämät hamuumdu'joot.

²⁰⁻²¹ Cab jaduhñ quiädieeyä coo hajxy hotyijä ngaayy nhúucämät. Pero pø jii mäbøjpädøjc-hajxy jaduhñ näje'e miäna'añ cooc tyijy ja'a tsu'uch hajxy nga'a tsú'tsämät, cooc tyijy ja'a vino hajxy nga'a húucämät, pues, maas hoy jaduhñ coo mga'a tsú'udsät, coo mga'a hú'ugät. Hix, coo hajxy jaduhñ xyhíxät coo hñajty jaduhñ mgay mh'u'ugy, wehñdä hajxy jaduhñ xpiahíxät. Y coo hajxy jaduhñ xpiahíxät, cädiéeyäp hajxy jaduhñ. Jaduhñ quiähxø'øgät coo miich hñajty tøø myajcädieey. Y cab jaduhñ yhooyä coo mäbøjpädøjc myajcädieeyät hoy ñä'a tiiguiøxpä. Hix, jia wi'i pianøcxáañäbä Jesucristo miädia'agy hajxy jaduhñ, y coo hajxy jaduhñ quiädieeyät, cab hajxy jaduhñ hoy pianøcxät.

²² Hoy miich mja najuø'øy coo quia'a cädieeyä coo hotyijä mgay mhú'ugät, cab jaduhñ yhooyä coo wiinghänä'c mmøødyajtsibø'øwät. Ja'a Dios miich jaduhñ xyhijxp coo hoy mgudiuñ. Pøn jaduhñ najuøøby coo quiumayii ja'a Diósäm nebiä quiuhdujthaty, jootcujc je'eduhñ yhyty.

23 Pero pøn jaduñ ca'a najuøøby pø yejpiä Dios cuhdujt jaduñ coo tsu'učh ndsú'tsämät, pø caj, coo je'e jiaanč tsú'udsät, cädiéyöp je'eduhñ, hoy hamdsoo jaduñ jia mäna'añ cooc tyijy ja'a Dios tøø miäna'añ coo hajxy nga'a tsú'tsämät. Paady jaduñ miäna'añ, wehñdä tsu'učh hñajty tøø quiunuu'xyii maa habojtsnaxiä wyiinduumän. Jaanä jaduñduhmbä, hoy ñä'a tiiguiøxpä, pøn jaduñ ca'a najuøøby pø tøø Dios cuhdujt yecy je'eguiøxpä, o pø caj, coo jaduñ jiaanč jatcó'øwät, cädiéyöp jaduñmbä.

15

1-2 Nnajuóøyyäm højts jaduñ coo quia'a cädieeyä coo hajxy hotyijä ngaayy nhúucämät. Pero tsögä nmägu'ughajpädøjc ja'a Diosmädia'agy jaac yajmábøjcäm, ja'a hajxy naamdägø'øy habøjpä, ja'a hajxy jaduñ mänaambä cooc tyijy quia'a hawiinmatsä coogä tsu'učh ndsú'tsämät, coogä vino nhúucämät. Cabä nhamdsoo cuhdujthajtiä hajxy nyaghíjtämät; møødä Dioscuhdujt hajxy nyaghíjtämät.

3 Hix, mänaa Jesucristo yaa yhitiän hädaa yaabä naaxwiin, cabä yhamdsoo cuhdujt hñajty yaghity. Ja'a Tieediä miädia'agy jaduñ quiudiuunä, paady jaduñ chaačpøjcy. Jaduñ jim myiñ cujaay maa Diosmädia'aguiän: “Pønjaty miičh haxøøg xñänøømb, jaduñ mäwiin miäbaady néjjiäm høøch xñänøømbän”, nømä Jesucristo ja'a Tieedy ñämaayy.

4 Ja'a højtscøxpä Dios ja'a miädia'agy jecy yajcujahyyä, jaduñ hajxy hoy ngapxtáacämät. Jaduñ højtsä tøyhajt nmøødhájtäm coo Dios

yajtøjiada'añ neby jecy yajcujahyyän coo højts jim xyajnøcxáañäm maa wyiinduumän. Coo hajxy jaduññ nnajuøøyyäm coo hajxy jim nnøcxáañäm, paady hajxy hotyijä nme'e'xtújcämät. Cab hajxy tsøc jootmayhájtäm, hoy hajxy cøxpänejiä cu nja jajt cu nja habéjtäm.

⁵ Ja'a Dios hajxy jaduññ xpiuhbéjtäm coo hajxy jaduññ nme'e'xtújcämät, coo hajxy jaduññ nga'a jootmayhájtämät. Ween mijtsä Dios xpiuhbety coo hajxy jaduññ mbahíxät nebiä Jesucristo hoy yhitiän. Jootcujc hajxy jaduññ mnimiøødhidøøjät tu'ugmädia'agy.

⁶ Jaduññ hajxy tu'ugmädia'agy mhídät coo Dios hajxy mgapxpáadät møj jaančh. Ja'a Dios, ja'a Jesucristo Tieedy je'e. Ja'a Jesucristo hajxy nWiindsønhájtäm.

⁷ Hoorä, nebiä Jesucristo hajxy xchójcäm, jaanä jaduññ hajxy hamuumdu'joot nničhójcämbät. Coo cu'ug hajxy jaduññ xyhíxämät coo hajxy hänajty nničhójcäm, jaduññä cu'ughajxy ñajuø'øwaambä coo Dios miøjjä jiaančhä.

⁸ Jéquiänä Dios jaduññ miänaañ coogä yajñähwaats yajcuhwaatspä quiexa'añ maa judíoshajxiän. Ja'a judíos ja'a yhapä tieedy hajxy, je'eds hajxy jaduññ jecy hawáañäxä, møødä Abraham, møødä Isaac, møødä Jacob. Coo Jesucristo yaa quiejxä hädaa yaabä naaxwiin, hoyyä judíoshajxy piuhbedyii. Tøjiajt jaduññ nebiä Dios jecy miänaañän coo yajñähwaats yajcuhwaatspä hänajty quiexa'añ. Hix, tømíädiaacpä Dios. Caj mänaa yhøhnda'agy. Tøyhajt jaduññ.

⁹ Jaaná jaduhñduhmbä, paadiä Jesucristo yaa quiejxä, hoyyá jäya'ayhajxy piuhbéjtäbä, ja'a hajxy ca'a judíospä. Coó hajxy jaduhñ ñäxúu'tsäbä ja'a Diósäm, paadiä Dios hajxy mõj jaančh quiapxpaady. Jaduhñ jim myiñ cujaay maa Diosmädia'aguiän:

Miičh ngapxpaadaamby mõj jaančh näguipxy møød hajxy ca'a judíospä.

Høyháamhøch miičh nwiingudsähgø'øwa'añ, nõmä Dios ñämaayyá.

¹⁰ Wiingtuumä Diosmädia'agy myíingumbä cujaay: Mijts ca'a judíospä, xoonða'ag hajxy møødä Dios quiu'ughajxy näguipxy.

¹¹ Jaduhñ cujaay myíingumbä wiingtuum: Mijts ca'a judíospä, weenä Dios hajxy mõj jaančh mgapxpaady wiinduhmyhagajpt.

¹² Wiingtuumä Isaías jecy quiujáhguiumbä: Ja'a Isaí yhapä yhoc, minaamb je'e miähane'ema'añ.

Ja'a jäya'ayhajxy ca'a judíospä, je'eds hajxy jaduhñ hane'emáanäp.

Jaaya'ay hajxy jaduhñ jiøbhijxyp coó hajxy min yajnähwa'ads yajcuhwa'adsa'añii, nõmä Jesucristo jecy ñänøømä, møødä jäya'ayhajxy ca'a judíospä.

¹³ Hoorä mijts, coó Diosmädia'agy hajxy tøø mmäbøcy, weenä Dios hajxy hoyhoy xyajxoonða'agy, ween hajxy xyaghity jootcuyc. Hix, tøø Dios hajxy xyhawáañäm coogä hoyhajtä weenhajt hajxy xmio'owáañäm ca'xy pedyii. Hamuumdu'joot hajxy jaduhñ mjøbhíxät. Xpiuhbédbä Dioshespíritu hajxy jaduhñ ja'a miäjaahaam.

14 Mägu'ughajpädøjc, nmóødhøchä tøyhajt jaduhñ coo hajxy hamuumdu'joot mniçhocy mnibia'häyoyii, møød coo hojiot hajxy mmøødä, møød coo Diosmädia'agy hajxy hoy mwiinjuø'øy, møød coo hajxy mjaty mägapx hane'em.

15-16 Nébiøch hädaa nocy chamñ ngujaayän, hamøc hadsaäch mijts tøø nmägapxy tøø nhane'emy. Nyagjahmiejchp mijts jaduhñ jadähooc. Nmóødhøchä cuhdujt jaduhñ cooch mijts nyagjahmiédsät. Hix, ja'a Dióshøch jaduhñ tøø xtiuungmo'oy coochä miädia'agy nyajwá'xät ja'a Jesucristocøxpä jim maa mijtsän, mäduhñtiä hajxy mga'a judíoshaty. Coo jäya'ayhajxy nämay miábøgät hamuumdu'joot ja'a Dioshespíritu miäjaahaam, mänit hajxy quiumaya'añii ja'a Diósäm.

17 Jootcújc-høch jaduhñ nnijwiø'øyii coochä nduung tøø yhoyø'øy, ja'a Dióshøch tøø xmió'oyäbä. Ja'a Jesucristøch jaduhñ xpiuhbejp, páadyhøch nduung tøø yhoyø'øy.

18 Jayóoyyøch chamñ nmädia'aga'añ nebiátyhøchä Jesucristo xpiuhbejty mänáabøchä jäya'ay ja'a Diosmädia'agy nyajmábøquiän, ja'a hajxy ca'a judíospä. Cábøch nmädia'aga'añ nebiatiä wiinghäna'c-hajxy tøø tiuñ. Mädia'agyháamhøchä jaaya'ay nyajmábøjcy, møød coochä hoy-yagjuøøñäbä hänäjty nyajcähxø'øgy.

19 Ja'a Dios, ja'a miäjaahaamä hijxtahñd tøø yajcähxø'øgy hoy-yagjuøøñä. Ja'a yhEspírituhaamä jäya'ay tøø yajmábøcy. Wiinduhmyhagájpthøchä Diosmädia'agy hoy nyajwa'xy ja'a Jesucristocøxpä, coo jaaya'ay hajxy hoy xñähho'túutäm. Jímhøch ndägøøyy wädijpä Jerusalén. Jäguémhøch hoy

nwädity. Høxtä jímhøch hoy nwädity maa naax xiøhatiän Iliria.

²⁰ Jayóoyøch jim tøø nwädity majatiä Jesucristo hänajty tøø quia'a mädoyhadyiijän. Jadúhnhøch nnä'ägä wädityhaty. Hix, cábøchä Dios xtiuungmooyy coøch nwädítät maa wiinghänä'cä Diosmädia'agy hänajty tøø yajwa'xiän.

²¹ Pønjatiä Diosmädia'agy tøø quia'a mädoy, je'eèch tøø nyajwiingapxø'øy. Jaduhñ jim myiñ cujaay jaaya'aguiøxpä maa Diosmädia'aguiän, ja'a hänajty cahnä miädoybä:

Pønjaty ca'a mädoobnä coo Dios ja'a yajnähwaatspä
tøø quiexy, je'edshajxy jaduhñ
mädoyhadaamb.

Ja'a jäya'ayä Diosmädia'agy hajxy hijty ca'a mädoobnä, jaduhñ hajxy yajmøødmädia'aga'añii coo hajxy ñäxuuchii ja'a Diósäm.

²² Tøøch jim mayhooc nja nøcxa'añ maa mijsän jim Roma. Pero cábøch hijty xñäbaadøøyyä coøch jim nnøcxät. Hix, ja'a Diosmädia'agyhøch hijty nyajwa'xyp wiinduhmyhagajpt.

²³ Pero tøøch nwädiypädøøñä wiinduhmyhagajpt. Mobädájpnoch jim nnøcxaannä maa mijsän. Tøø jaduhñ majiomøjt yhijnä coøch jim tøø nja wi'i ñøcxa'añ maa mijsän.

²⁴ Cooch mábøcy hänajty jim nnøcxa'añ España, mänítøch mábøcy jim ndu'unaxó'owät maa mijsän. Jootcújc-høch jaduhñ nniwio'owøøjät coøch mijts jaduhñ nguhíxät. Mänítøch njaac tu'uyó'oyät coøch hänajty jim nnøcxa'añ España. Mänítäts mijs hii xpiuhbédät.

25-26 Pero cab jaduñ choj näbaadø'øwa'añ cooçh jim̄ nnøcxät maa mijtsän. Hix̄, Jerusalénhøch jayøjp nnøcxa'añ. Xädø'øñhøch jim̄ nøcxy nyega'añ. Ja'a häyoobädøjc-høch nøcxy nmo'owa'añ, ja'a hajxy mäbøjpä. Ja'a mäbøjpädøjc-hajxy jim̄ tsänaabiä Macedonia møød jim̄ Acaya, jaaya'ayä xädø'øñ hajxy yajmujc. Høøchä xädø'øñ hajxy xyajmäguexaamb cooçh hänajty jim̄ nnøcxa'añ Jerusalén.

27 Hamdsoojoot hajxy yajmujcy, ca'a yhøøchä nnämaayy coo hajxy yajmúgät. Hawiinmats jaduñ coo mäbøjpädøjc-hajxy piuhbedøøjät, ja'a hajxy jim̄ tsänaabiä Jerusalén. Hix̄, judíoshajp hajxy je'e. Jaaya'ayä Diosmädia'agy hajxy jim̄ mäbøjtsohñ Jerusalén mänaabä Diosmädia'agy tiägø'øyän wädijpä ja'a Jesucristocøxpä. Mänitä jäya'ayhajxy høxhaam jiaac mädoyhajty, ja'a hajxy ca'a judíospä. Miäbøjc hajxy je'ebä. Paady jaduñ yhawiinmatsä coo ja'a judíoshajxy piuhbedøøjät ja'a jäya'ayháxiäm, ja'a hajxy ca'a judíospä.

28 Hoorä, cooçhä xädø'øñ hänajty jim̄ hoy tøø nyecy Jerusalén, mänitøch mäbøcy jim̄ nnøcxa'añ España. Mänitøch jim̄ ndu'unaxø'øwät maa mijtsän jim̄ Roma.

29 Y cooçh jim̄ nmédsät maa mijtsän, nägø'ø nädécypioçhä Jesucristo xpiuhbeda'añ cooçh mijtsä Diosmädia'agy nyajnähixø'øwät, jaduñ hajxy tu'ugmucy nhítämät jootcujc. Nmøødhøchä tøyhajt jaduñ.

30 Mägu'ughajpädøjc, tu'ugmädia'aguiä Jesucristo hajxy nmøødhítämbä, ja'a hajxy nWiindsøn hájtäm. Ja'a Dioshespíritu hajxy

xyajničhójcäm. Huuc tunä mayhajt hajxy maäch høøchcøxpän. Tsögä Dios hajxy hamuumdu'joot mänuu'xtáacäm maäch høøchcøxpän

³¹ coočhä Dios jim xñäwá'anät Judeanaaxooty maa jäya'ayhajxy ca'a mäbøjpän. Jaduhnä Dios hajxy nmänuu'xtáacämbät coočhä mäbøjpädøjc-hajxy jim jootcujc xtiøjmó'owät jim Jerusalén cooč jim nmédsät xädø'øñjejpä.

³² Y coo Dios jaduhn miäná'anät, mänítøch jim nwiimbídät, mänítøch jim jootcujc nnøcxät maa mijtsän. Jootcújc-høch jaduhn jim nbóo'xät. Hamiñ haxøpy hajxy mänit nnijjootcapxmøcpøjcämät.

³³ Xmióoyyämä Dios ja'a hoyhajtä weenhajt hajxy. Wéenäts mijts nägøxiä xpiuhbety.

16

¹ Jimhøchä nmägu'ughajpä tu'ug chäna'ay maa cajpt xiøhatiän Cencrea. Febe xiøhaty. Diosmädia'agymiäbøjp je'ebä. To'oxiøjc je'eduhn. Mäbuhbejp jaduhn maa tsajtøjcän.

² Coo Febe jim miédsät maa mijtsän, naxy hajxy jootcujc mdehm miägu'ugpógät ja'a Jesucristocøxpä. Hawiinmats coo hajxy jaduhn mmägu'ugpógät pønjatiä Diosmädia'agy mäbøjp. Mmó'owäbä Febe hajxy jaduhn tijaty yajmaajia-jpy. Hiç, náxyhøch jaduhn xpiuhbety. Nämày hajxy jaduhn tøø piuhbetyii.

³ Nyajpóo'xypøchä Prisca møødä Aquila. Tøøch hajxy jaduhn xmiøødtuñ ja'a Jesucristocøxpä.

⁴ Tøøch hajxy jaduhn jim xñäwa'añ mähahñdium. Páadyhøchä Dioscujú'uyäp nmo'oy.

Jaduhñ mäbøjpädøjcä Dioscujú'uyäp hajxy yejpä, ja'a hajxy ca'a judíospä, wiinduhmyhagajpt.

⁵ Møødhøçhä jäya'ay jaduhñ nyajpoo'xpä, pønjaty jaduhñ hamugøøby Dioswiingudsähgøøbiä maa Prisca tiøjc-hajxiän. Møødhøçhä Epeneto nyajpoo'xpä. Jaançh tehñ yhóyhøch je'eduhñ xmiägu'ughaty. Jaayá'ayäts jim mäbøjtsohn ja'a Jesucristocøxpä maa naax jaduhñ xiøhatiän Asia.

⁶ Nyajpóo'xypøçhä Maríabä. Jaançh tehñ yhoy jim tiuñ maa mijtsän.

⁷ Nyajpóo'xypøçhä Andrónico møødä Junias. Høøch nmägunaaxhajxy je'e. Näguípxyhøch hajxy hijty xmiøødtsumyçhäna'ay. Hoy piønä jaduhñ ñajuø'oy coo hajxy Dyiosquexiä. Paady hajxy jaduhñ quiejxä, coo Diosmädia'agy hajxy jaduhñ yajwá'xät. Jayøjp hajxy miäbøjcy ja'a Jesucristocøxpä. Høøch høxhaam njaac mäbøjc.

⁸ Nyajpóo'xypøçhä Ampliato. Hóyhøch je'e xmiøødnijootpaadyi ja'a Jesucristocøxpä, ja'a hajxy nWiindsønhtëm.

⁹ Nyajpóo'xypøçhä Urbano. Näguipxy hajxy je'e xmiøødtúnäm ja'a Jesucristocøxpä. Nyajpóo'xypøçhä Estaquis. Hóyhøch je'eduhñ xmiägu'ughaty.

¹⁰ Nyajpóo'xypøçhä Apeles. Tøø jiaançh tehñ miee'xtucy ja'a Jesucristocøxpä. Nyajpóo'xypøch pønjaty jaduhñ jim tsänaaby maa Aristóbulo tiøjcän, ja'a hajxy mäbøjpä.

¹¹ Nyajpóo'xypøçhä Herodiön. Høøch nmägunaax je'ebä. Nyajpóo'xypøch pønjaty jaduhñ jim tsänaaby maa Narciso tiøjcän, ja'a hajxy mäbøjpä.

12 Nyajpóo'xypøchá Trifena møødä Trifosa. Tuumb hajxy jaduhñ ja'a Jesucristocøxpä, ja'a hajxy nWiindsønñájtämbä. Nyajpóo'xypøchá Pérsida. Jaančh tehñ chójcäp je'e. Hoy jiaančh tehñ tiuumbä maa Jesucristocøxpän.

13 Nyajpóo'xypøchá Rufo møødä tiaj. Jaančh tehñ yhoyyä Rufo ja'a Jesucristo miädia'agy pianøcxä. Jaduhñhøchá tiaj njuøoyyä nébiøch nhamdsoo tajján.

14 Nyajpóo'xypøchá Asíncrito, møødä Flegonte, møødä Hermas, møødä Patrobas, møødä Hermes, møødä mäbøjpädøjc jaac jimä.

15 Nyajpóo'xypøchá Filólogo, møødä Julia, møødä Nereo møødä piuhdo'oxy, møødä Olimpas, møødä Diosmädia'agymiäbøjpähajxy jaac jimä.

16 Xi'ig xon hajxy mniyajpoo'xøjät ja'a Jesucristocøxpä. Xyajpoo'xp mijtspä, ja'a hajxy mäbøjpä ja'a Jesucristocøxpä wiinduhmyhagajpt.

17 Mägu'ughajpädøjc, jii jäya'ayhajxy näje'e wiädity, wiing hajxy yajnähiø'øy; cab hajxy yajnähiø'øy nej mijts tøø mhabøquiän ja'a Jesucristocøxpä. Cabä jioot hajxy xyajmädsocy coo mijts tu'ugmädia'agy mhídät maa Diosmädia'agyquiøxpän. Jaduhñ hajxy yajnähiø'øy coo wiingmädia'agy hajxy mbadu'ubøgät. Naxy hajxy mdehmñigwieendähadójät maa jaaya'ayhajxy jaduhmbän. Cab hajxy jimñ mñøcxø'øwät maa jaaya'ayhajxy jaduhmbän.

18 Hiç, cabä Diosmädia'agy hajxy yajnähiø'øy ja'a Jesucristocøxpä. Jaduhñ hajxy yajnähiø'øy nebiä cu'ughajxy jia mädowna'añän. Paady hajxy jaduhñ yajnähiø'øy, yajmäjuyaamb hajxy jaduhñ;

jaduhñ hajxy hoy jiatcø'øwa'añ nebiä jioot hajxy choquiän. Hoy yajxón hajxy jia capxy jia mädia'agy. Pero xjia wi'i yajtägoyyaamb mijts jaduhñ.

19 Hopiønä tøø miädoyhaty coo mijtsä Diosmädia'agy hamuumdu'joot mmäbøcy ja'a Jesucristocøxpä; páadyhøch jootcuyc mnijiäwø'øyii ja'a mijtscøxpä. Jaduhñ mijts nyajmädsocy coo hajxy mniyajcopcø'øwøjät, jaduhñ hajxy hoy mwädítät, jaduhñ hajxy haxøøg mga'a jäya'ayhádät.

20 Ja'a Dios hajxy xyaghidaamb jootcuyc. Coo hajxy mga'a møjpädá'agät waambatiä hønndaacpä hajxy xjia wi'i yajnähixø'øwa'añ, jaduhñä Dios ja'a møjcu'ugong quia'a yajmäjädá'agät. Y cabä møjcu'ugong hajxy nej xtiúunnät. Ween mijtsä Jesucristo ja'a hoyhajtä weenhajt tehngajnä xmio'oy, ja'a hajxy nWiindsønähajtämbä.

21 Xyajpoo'xp mijtsä Timoteo. Høøch jaduhñ xmiøødtuumb. Jaanä xyajpoo'xp mijts jaduhñ ja'a Lúciobä, møødä Jasón, møødä Sosípater. Haagä høøch nmägunaaxhajxy je'e.

22 Høøch Tercio, høøch hädaa nocy ngujahby. Jaanä høøch mijts nyajpoo'xpä ja'a Jesucristocøxpä.

23 Xyajpoo'xp mijtsä Gayo. Yaäch jaduhñ nhity ja'a Gayo tiøgooty. Yejpiä tiøjc jaduhñ coo mäbøjpädøjc-hajxy yaa yhamugó'øwät Dioswiingudsähgøøbiä. Xyajpoo'xp mijtsä Erasto. Jim je'e tiuñ haguyc. Xädø'øñgwieendähajp jim. Møødä hermano Cuarto hajxy xyajpoo'xpä.

²⁴ Ween mijtsä Jesucristo ja'a hoyhajtä weenhajt xmio'oy nägøxiä. Amén.

²⁵ Hoorä, tsögä Dios hajxy mõj jaanč capxpáatäm. Jaaya'ay mijts hamuumdu'joot xjiaac yajmábógäp ja'a Jesucristocøxpä. Jadúhñhøch nnä'ägä yajnáhixø'øyhaty coo Dios ja'a Jesucristo quiejxy. Jaduhñä Jesucristo hajxy hoy xyajnáhwáatsäm nägøxiä, møødä judíoshajxy, näguipxy møødä ca'a judíoshajxypä. Tøyhajt jaduhñ. Jéquiänä Dios jaduhñ wyiinmaayy, pero cab jaduhñ choj yajtøjiajty. Paady hajxy nga'a tsoj wiinjuóøyyäm.

²⁶ Pero jim jaduhñ myiñ cujaay maa Diosquexyhajxy jecy quiujahyyän. Jim jaduhñ cøxiä quiapxtøy. Naamnä hajxy jaduhñ tøø nwiinjuóøyyäm. Paadiä Dios jaduhñ yhanehmñä coo mädia'agy ja'a Jesucristocøxpä wiá'xät wiinduhmyhagajpt, jaduhñä jäya'ayhajxy nägøxiä miábógät, jaduhñ hajxy quiudiúumbät. Homiänaajä Dios yhity.

²⁷ Jagooyyä Dios tøø wyiinmay coo hajxy xyajnáhwáatsäm, coo hoyhajtä weenhajt hajxy xmióoyyäm. Ja'a Jesucristocøxpä Dios mõj jaanč quiapxpaadyii cøjxta'axiøø. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

4e564219-157f-5807-b810-47a15308b8b8